

MATEO JESUCRISTO ENIRUEMO ILLA RAFUE CUIAFUE

*Jesucristo ie usumatiai
(Lc 3.23-38)*

¹ Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori.

² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori.

³ Judá micori jitodi Fares micori. Jiaie jitodi Zara micori. Iaimai micori eidi Tamar micori. Fares micori jitodi Esrom micori. Esrom micori jitodi Aram micori.

⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón.

⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori.

⁶ Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñaona ollena, David micori Urías micorina jobaimemo orede. Jobaimemo naimie fiodailla mei, naiñaiñaona ote.

⁷ Salomón micorî jîtodî Roboam micorî. Roboam micorî jîtodî Abías micorî. Abías micorî jîtodî Asa micorî.

⁸ Asa micorî jîtodî Josafat micorî. Josafat micorî jîtodî Joram micorî. Joram micorî jîtodî Uzías micorî.

⁹ Uzías micorî jîtodî Jotam. Jotam micorî jîtodî Acaz. Acaz micorî jîtodî Ezequías micorî.

¹⁰ Ezequías micorî jîtodî Manasés. Manasés micorî jîtodî Amón. Amón micorî jîtodî Josías.

¹¹ Josías micorî jîtodî Jeconías micorî. Jeconías micorî amatiai micorîai jiaî itimaci. Naie facaisec-
oni Babilonia railla nairai dine naie nairai sol-
daduai cai cominina uitimaci.

¹² Naie meinomo Jeconías micorî Salatiel micorîna comuitate. Salatiel micorî jîtodî Zorobabel micorî.

¹³ Zorobabel micorî jîtodî Abiud micorî. Abiud micorî jîtodî Eliaquim micorî. Eliaquim micorî jîtodî Azor micorî.

¹⁴ Azor micorî jîtodî Sadoc micorî. Sadoc micorî jîtodî Aquim micorî. Aquim micorî jîtodî Eliud micorî.

¹⁵ Eliud micorî jîtodî Eleazar micorî. Eleazar micorî jîtodî Matán. Matán micorî jîtodî Jacob micorî.

¹⁶ Jacob micorî jîtodî José micorî. José micorîdi
María ini. Naiñaiñodi Jesús ei. Naimie mameci
jiaicidi Cristo.

¹⁷ Abraham micorî illa facaisemona David micorî jeicia facaisemo Jesús ie catorce nanoramaci mameci jai ite. David micorî facaisemona Babiloniamite nairai anamo cai jaiagai illa facaisemo catorce nanoramaci mameci jiaî ite. Babiloniamite nairai anamo cai jaiagai

illa facaisemona Jesús jeicia facaisemo catorce nanoramaci mameci jiaí ite.

Jesús jeicia rafue

(Lc 2.1-7)

¹⁸ Jesucristo comuilla rafuena lloiticue. Jesús eidi María. Naiñaiñona jicantimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñona uruesitate.

¹⁹ José micori maremie. María jai uruesillana naimie micori fidianona, naiñaiñona meidaitañellena jira, naiñaiñona bainino dotaacade. Jiaimie diga illamona urueside raillanona comecina facajanona, naiñaiñona dotaacade.

²⁰ Naimie micori comecina iemo facaia, naimie micori nicairillanona, naimie micorimo Jusiñamui jaienici bairiano raite:

—José, David micori jito, Maríana jaciruiñeno ono, o aina illena. Jusiñamui Joreño naiñaiñona jai uruesitate.

²¹ Iimana jocoite. Ie comini naimaci jeacinomona naimie jilloitajaibilla jira, Jesúna o jítalle naimie mamecidi —raite.

²² Bie rafue suide, Jusiñamuidi ie lloraima micori jaie llotataga uaina suillena.

²³ Jaie llotatate:

Iimana uiñoñediñaiño como comuite uruedi.

Iimana jocoite.

Emanuel ie mameci jítalle.

Bie mameci oni dobañuamona raite: “Jusiñamui caí diga ite”.

²⁴ José micori casidemo, Jusiñamui jaienici lloga uaina finode. Maríana ote, ie aina illena;

25 iadedi nai jitona naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jitade naimie mamecina Jesúna.

2

Monamo ite ramo comeciaina facauidino rafue

1 Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micori. Monamo ite ramo comeciaina facauidino naie facaiseconi Jerusalémo jitoma billafo dinena bitimaci. Jerusalémo itinomo jicanotimaci:

2 —¿Ninomo como jeiciga omoi judíuai illaimadi? Jitoma bisoillafomo como bairede ucuduna ciodicai. Naiemona naimie jeicana jai uiñotícaí. Naimiemo iobillacinona fecallena bitícaí.

3 Herodes micoridi naicinona cacajanona, ie comeci jarire ite. Jiaimie naimie meifomo illana jitañede. Jerusalémo itinodi jiai jarire itimaci.

4 Ie facaise Herodes micori judíuai illaicomínina uaiduanona, naimacimo Cristo raillamie jeicana jicanote.

5 Uai otimaci:

—Judea railla eniruemo. Belémo. Iena Jusiñamui facaina micoridi jaie cueda:

6 Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla comínina sedaite. Iemona Belén nairai Judea illaicomíni baifemo faite

cuega.

⁷ Iena cacaja mei, Herodes micoridi monamo ite ramo comeciai facauidino bainino uaidote. Naie ucudu bairia facaise raise uñollena jicanote.

⁸ Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillesa. Naimiemo iobillacinona jiai feaacadicue —llote.

—Jii —fairiotimaci.

⁹⁻¹⁰ Iena naimie micori llua mei, jaidimaci. Ucluduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride.

¹¹ Fo jaillano uruena, ie ei María diga, cioidimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiai fecadimaci.

¹² Naimaci inia anamo naimaci nicairillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

Egiptomo Jesús jailla rafue

¹³ Naimaci jailla mei, José micori inia anamo nicairite. Nicairillanona, Jusiñamui jaienicidi naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

¹⁴ José micori raire casillano, nai urue diga, Jesús ei diga, Egiptomo naiona jaide.

15 Herodes micorí fiódaille dínorí nainomo íte. Íe muidona Jusíñamui íe facaina lloráima micorí llotataga uai jai suide. Jai e lloga: “Egiptomona cue Jítóna jai uaidotícue”.

Mena años itisaíai díerisedena faia rafue

16 Egiptomo Jesús jaillana Herodes micorí fidiñede. Monamo íte ramo comeciána facauídino naimaci eníruemo abído jaillana naimie micorí jiaí fidiñede. Naimie micorí díne naimaci abído biñena jira, naimie micorína naimaci jífuia jira, naimie micorí eo ícíríte. Íe jira mena años itisaíai díerisedena faetate. Nana Belémo íte íisaíai díese faetate. Belén ecimo ítino uruíaina jiaí faetate. Naie ucudu mena años jai e nano bairena jira, mena años itisaíai díerisedena faetate.

17 Raquel micorí jai e ía ísoi, Belén ítino bíruí eedímaci. Jeremías micorí íena jai e cuega:

18 Ramá railla náiraí dínená Raquel micorí eo eiana cacadícue.

Cai usuño Raquel micorí eede.

Naiñaiño micorí uruíai micoríaí facaina eede.

Jiaíe comínimona fíraduacínona jítaíñede, naiñaiño uruíai micoríaí jai fiódaila jira.

19 Dígaruí íllanona, Herodes micorí fiódaila meí, Egiptomo José micorí dane nícaíríllanona, Jusíñamui jaienicí naimiemo bairedé.

20 Llote:

—O comíní eníruemo ná o urue díga, íe eí díga, abído maí jai. Naí o uruena meíneiacadímie jai fiódáite.

21 Íe jira íe eníruemo náie urue díga, íe eí díga, abído jaide.

²² Herodes micorí jitodí ie moo ifomo jai il-lana José micorí fidiano, jaciruite. Herodes micorí jito mamecidi Arquelao. Nainomo José jaiacaiñede. José micorí dane nicaírillanona, Jusiñamuidí Galilea railla eniruemo naimie jail-lena naimiemo llote.

²³ Nazaret railla nairai dine jaide, nainomo il-lena. Iemona Jusiñamui facaina lloraini micoriai jaie ciegafuiaí jai suide. Cristona jaie cuetimaci: “Naimiedi Nazaret imie”.

3

Jofue iñenanomo Juan Bautista micorí illa rafue (Mr 1.1-8; Lc 3.1-9, 15-17; Jn 1.19-28)

¹ Diga años illanona, Juan Bautista raillamie micorídi jofue iñenanomo illanona, cominina dafaiña, Jusiñamui rafuena naimacina llofueuide.

² Comini naimie micorí dine billanona, naimacimo llote:

—Omoi jeacinona fañonocaida, omoi comeciai iuailai meido. Jusiñamui dibeimo omoi i. Naimie anamo omoi illana naimie jitailla jira, omoi iena lloiticue —llote.

³ Isaías micorídi Jusiñamui facaina lloraíma. Juan Bautista micorí nia iñenia, Isaías micorídi naimie micorína jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite.

⁴ Juan micorídi camello itiraiái ie nilla iniroina jítade. Igoi iena ie moilligaina jítade. Fioduaina rite. Ciifona mete. Jamai rana guite.

⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fue-mona jai jaisoidimaci.

⁶ Jusiñamui naimaci jeacinona naimaci llua meino, naimacidi Juan micori bautizaga.

⁷ Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isidomoi. ¿Niese Jusiñamui riicaillifue-mona jilloitomoi? Cue dine omoi billena, ¿bu omoi-mo llua?

⁸ Omoi comeciai iuaillai meido. Omoi jeacinona fañonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuaillai meiduana uiñoiticaí. Ie mei omoi bautizallomoi.

⁹ Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaillifue-mona jilloiticaí”. Ero, omoi-mo lloiticue: Cue llua isoi omoi finoñena, naimie riicaillifue-mona jilloñeitomoi. Abraham micori uruiaidomoi; iadedi Jusiñamui jitaillacinodo jiacaiñedomoi. Naimie jitaia, naimie jitaillacinona naimaci finollena, bene ite noñicimona naimiedi Abraham micori facaina uruiaina comuitarede.

¹⁰ Ero, llisiñede riarra tiedomoi. Tia mei, maraiñena jira, iena jobaidomoi. Ie isidomoi. Omoi maraiñena jira, Jusiñamui omoi-na jai duere finoacade. Ie riicaillafue anamo jai itomoi. Omoi comeciai iuai omoi meidoñena, omoi-na duere finoite.

¹¹ Jusiñamui dibeimo omoï comeciaï iuai omoï meidoia, jinui diga omoïna bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dibeimo omoï jaillamona, Jusiñamui Joreño omoïmo itataite. Omoï comeciaï iuai omoï meidoñenia, omoïna duere finoite.

¹² Trigona omoï betaia, mare trigona eenotomoï. Marañede ra oni dotajanona, iena jobaitomoï. Ie isoide. Naimie rafuena lluanona, comeciaï iuailai meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duiñede –llote.

Jesús bautizaja rafue
(Mr 1.9-11; Lc 3.21-22)

¹³ Juan micori Jordán dine nia ia, Galileamona Jesús bite. Naimiena bautizallena, Juan micori dine bite.

¹⁴ Juan dinena naimiemo llote:

–Bautizallena cuemo bitio; ia dama ite. Cuen a o bautizaia, cuemona mare.

¹⁵ Jesús uai ote:

–Cuen a mai o bautiza. Nana Jusiñamui jitailla rafue coco finoia, mare.

Juan:

–Jee –raite. Ie facaise naimiena bautizade.

¹⁶ Jesús bautizaja mei, jinuimona bite. Mona bojodena ciode. Jusiñamui Joreño, ucugi isoi, naimie emodomo ana billana ciode.

¹⁷ Ie facaise monamona Jusiñamui llote:

–Bimie cue eo isiruiga Jito. Naimieri iobidicue.

4

Jesúna Taiŕe ramo faia rafue (Mr 1.12-13; Lc 4.1-13)

¹ Naie facaise nainomo naimiena ramo Taiŕe faillena, jofue iñenanomo Jusiñamui Joreño Jesúna uite.

² Cuarenta digarui Jesús guiñede. Naie facaise fuilla mei, guiñeno illamona, aimetaite.

³ Ie facaise Taiŕe naimie dine bite. Jesús aimetailana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomeniconajaita”.

⁴ Jesús uai ote:

—Dama ite. O lluana finoñeiticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

⁵ Ie mei Jerusalémo Jusiñamui jofu muidomo Taiŕe Jesúna uite.

⁶ Raite:

—Jusiñamui Jitodiodena, eniruemo mai ana uai. David micori ona jaie cuega:

Ona eenollena, Jusiñamuidi ie jaienisaimo lloite. Eniruemo o uaiñellena, o abi bofedaiñellena, ona feiñoitimaci

cuega. Naie lloga uai suillena, bie jofu muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina

facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluana finoñeiticue.

⁸ Ie mei a ite anedumo Taife naimiena uite, naie anedumona nana nairaiaina cioillena. Naie nairaiái eo ebire eruaide.

⁹ Naimiemo llote:

—Nana bie nairaiái cue anamo birui illamona, cuena o sedaia, nana bie nairaiái omo iitícue. O caiñici ifodo ana rainada, cuemo iobillacino o fellena.

¹⁰ Jesús uai ote:

—Dama ite. Ona sedañeiticue. Ie cominimo Moisés micorí jaie cuela: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai.

¹¹ —Ie facaise naimiemono Taife jaide. Naimie jailla mei, Jusiñamui jaienisai Jesús dine bitimaci. Naimiena ecallena bitimaci.

Galileamo Jesús illa rafue

(Mr 1.14-15; Lc 4.14-15)

¹² Naie facaise Juan Bautista micorína Herodes gaitajana naimie fidiano, Galilea railla eniruemo Nazaretmo Jesús jaide.

¹³ Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiai ite.

¹⁴ Nainomo Jesús jailla jira, Isaías micorí jaie cuela fuiaí jai suide.

¹⁵ Naimie micorí naie cominina jaie cuela:

Bie eniruemo diga nairai ite.

Zabulón ite. Neftalí ite.

Monailai fuemo nairai ite. Jordán ruicafebeimo nairai ite.

Galileamo nairai jiai ite. Nainomo judúuaiñedino jai itimaci.

¹⁶ Jeacino anamo naimaci illamona, naga naie eniruemo ite comini jitiredinomo itimaci isoidimaci

Jusiñamuina uiñoñoeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie bairenite

cuega. Jusiñamuina naimaci uiñoñoena jira, naimacina iese cuega. Jesús nainomo birui llofua jira, mare rafuena jai cacaidimaci.

¹⁷ Galileamo rilla mei, Jesús llocana jaide. Llofuede:

—Jusiñamui dibeimo illena, omoi jeacinona fainonocaida, omoi comeciái iuaina meido. Ie cominina omoi jaillena birui jitaide.

Ie llofueoicaiganona jaillena, Jesúdi nagaam-

agamiena fetua rafue

(Mr 1.16-20; Lc 5.1-11)

¹⁸ Jiairuido Galilea railla jorai fuemo Jesús macaritemo, menamiena ciode. Naga ie ama iaímaiaí. Damie Simón. Jiaici naimie mamecidi Pedro. Ie ama Andrés diga ite. Lloijina fairaima iaímaiaí. Iese jaca naie iaímaiaídi majiuidiaímaiaí.

¹⁹ Iaímaiaímo llote:

—Cue diga omico jaiocaillena, cue diga mai bi. Cue llofueganona omico jaillena jitaídícue. Lliciaína birui ocabitomico; iadedi cominina oitomico, cue dibeimo naimaci illena.

20 Iena cacajanona, ieconi iaïmaiaï lloijina faïnonocaida, naimie ðiga jaidiaïmaiaï. Ie llofueganona jaillena, jaidiaïmaiaï.

21 Lliaï bai Jesús jaidemo, jiaïe menamiena ciode. Naga ie ama iaïmaiaï. Damie Jacobo. Jiaïmie Juan Iaïmaiaï moodi Zebedeo. Naimie ðiga botemo itiaïmaiaï. Lloijina sigaidimaci. Jesús iaïmaiaïna uaidote, naimie llofueganona jaillena.

22 Ieconi iaïmaiaï moona faïnonocaida, bote-mona ari billanona, Jesús ðiga jaidiaïmaiaï.

*Jesús ailluena cominina llofuia rafue
(Lc 6.17-19)*

23 Nana Galileamo Jesús jaide. Judíuai ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui ðibeimo naimaci comeciaï iuaina meidwana llofujete. Ie cominina naimaci illena llofujete. Naga isoide duicono duidinona jillotate.

24 Iemona nana Siria railla eniruemo naimie mameci soride. Naie comini naga isoide duicono duidinona naimie ðine atidimaci. Abi isiredinona atidimaci. Jananiaï anamo illa cominina atidimaci. Naillidinona atidimaci. Niraïdanidinona atidimaci. Nana naimacina jillotate.

25 Ailluena comini naimiena racadimaci. Galileamona, Decápolimona, Jerusalémona, Judeamona, Jordán ruica ðibeimona comini bitimaci.

5

*Anedumo naimie ia, Jesús lloga rafue
(Lc 6.20-23)*

1-2 Ailluena cominina Jesúna racadimaci. Naimacina Jesús cüanona, anedu muidomo jaide. Ie llofueoicaigano naimie diga jaidimaci. Nainomo ana raíta, Jesús naimacimo llote:

—Omoína Jusiñamui ie cominina sedaacana rafuena ja llofueitícue. Naimie anamo naimaci illena llofueitícue.

³ Ero, Jusiñamui naimiëna jitaidinona sedaite. Comeciaina facadimaci: “Naimie jitaillacinona daní finonidícaí; ia naimie caina canuanona, iëna finoitícaí”. Naimie cominina naie isoidino illamona, naimie naimacina canoite. Iëmona caimare iitimaci.

⁴ Jusiñamui sunaitinona sedaite. Ailluena comini jeacino finocana jaidimaci. Iëna uiñuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuiñotaite. Iëmona caimare iitimaci.

⁵ Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemo cominina ico cue sedaia, iëse iite. Iëmona caimare iitimaci.

⁶ Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iëmona caimare iitimaci.

⁷ Jusiñamui cominina duenaitinona sedaite. Naimacina naimie duenailamona, Jusiñamui naimacina ico duere finoñeite. Iëmona caimare iitimaci.

⁸ Jusiñamui jeanide começiredinona sedaite. Naimie cominina naie isoidino illamona, naimie diga jaca iitimaci. Iëmona caimare iitimaci.

⁹ Jusiñamui naimie diga uri itinona sedaite. Naimie cominina naie isoidino illamona, jiaie

cominina uri itataitimaci. Naie isoidino naimie cominina jaca mamecirenitimaci. Iemona caimare iitimaci.

¹⁰ Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaitimaci. Iemona caimare iitimaci.

¹¹ Cuemo omoi duia, duere sefuitomoi. Jiaie comini omoina jeare ñaitimaci. Omoina duere finoitimaci. Omoi joreñona tainona lloitimaci. Duere sefuitomoi; iadedi Jusiñamui omoina caimare itataite.

¹² Omoi isoi omoi jaiagamona Jusiñamui facaina lloraini micoriai jaiie duere sefuidimaci. Iena omoi uñuamona, monamo Jusiñamuimona ailluena ibana ico omoi feñua jira, birui omoi duere sefua, iocire omoi jai.

Jesús comini illa rafue

(Mr 9.50; Lc 14.34-35)

¹³ Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai marañede. Iena rifaiñellena, llicisimo sal joneticai. Sal isoidomoi. Jusiñamui jitailla isoi omoi illamona, jiaie comini marañede rafuena eo finoñedimaci. Sal ie caimano jai iñenia, ¿ñiese dane nibaiamona caimarenite? Jai marañede. Jitaiñena jira, iena oni faiga. Ie isoide. Jusiñamui jitailla isoi omoi iñenia, naimie omoina duere finoite.

¹⁴ 'Cuemo omoi duilla jira, jiaie cominina Jusiñamuina omoi uñnotajamona, lligaiñora isoidomoi. Anedumo ite nairai jaca bairede. Ie

illanona jaca uiñoticaí. Jusiñamui jitailla isoi omoi illamona, jiaie comini naimiena uiñotimaci.

¹⁵ Lamparín unia mei, cirigai anamo buna rainañega. Jaca ie rainarafomo rainaca, nana jofojeraina lligaiñollena.

¹⁶ Ie isoide. Cue rafuena jamaiñeno; iadedi omoi marena illamona, cominina Jusiñamuina uiñota. Omoi marena illamona, comini omoi mare finoca rafuena uiñotimaci. Iemona: “Jusiñamui maremiena” raitimaci.

Jesúdi Moisés micorina llofua rafue

¹⁷ Jesús llote:

—Jusiñamui ie cominina sedaacalle rafue nia llofueiticue. Iena cue llofua jira, omoimona damierie comecina facade: “Bimie Moisés micori lloga rafuedo jaiñede”. Ero: “Moisés micori llogacinuai maraiñede” raiñedicue. “Jusiñamui facaina lloraini micoriai jaiie llogacinuai maraiñede” jiai raiñedicue; iadedi omoína naie llogacinaina raise uiñotaacadícue.

¹⁸ Biemo omoi comeciaina faca. Mona, enirue diga, nia ia, nana naie llogacinuai jaca suite.

¹⁹ Omoi einamací raitimaci: “Dajerie llogacino jiaie llogacino baifemo faite”. Cue raitícue: Naga llogacino omoi ñnoñenia, naga omoi llofueñenia, nana Jusiñamui jitaillacinona finoñedomoi.

²⁰ Ero, Jusiñamui jitailla rafuedo judíuai illacomini baifemo omoi jaiñenia, Jusiñamui sedajanomo jaca iñeitomoi. Naimaci naie jaiie llogacinuai uiñotimaci; iadedi naimaci comeciái Jusiñamui díbeimo iñedimaci.

*Jusúdi iciriñena llofuia rafue
(Lc 12.57-59)*

²¹ Jesús llote:

—Omoi llofuera in imona bie jai cacadomoi. Moisés micori omoi jaiagaimo llote: “Comena meineño. Comena bu meineia, jeacino jai finode. Naimie fiodaillena juez llua”.

²² Naie llogacinodo jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

²³⁻²⁴ 'Jerusalémo Jusiñamui jofomo omoi jeacino facaina naimiemo ra fecallena omoi jaia, omoi comini diga uri nano i. Jiaimie omoi diga icirillana omoi uibiñoia, omoi ra faionocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

²⁵ 'Omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina oretaite.

²⁶ Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitaño. Jeacino finoñellena, jiaimie diga iciriño.

Jesúdi iima ie añede riño diga illa llua rafue

²⁷ Jesús llote:

—Omoi llofuera inimona bie jai cacadomoi. Moisés micori jaie llote: “Omoi aiñede riñoniai diga iñeno. Omoi iniñede iñiaai diga iñeno”. “Iena bu finoia, jeacino jai finode” raitomoi.

²⁸ Jiaie rafue birui lloiticue. Ie aiñede riñomo eruailamona naiñaiño bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode.

²⁹⁻³⁰ Biena ñaiticue. Nie isoide rafue omoina jeacino finotaia, iemo eruaiñeno. Iena linoñoeno. Iemo comecina facañeno. Omoi ciua rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoñoeno.

*Jesúdi iima ie aina dotaja llua rafue
(Mt 19.9; Mr 10.11-12; Lc 16.18)*

³¹ Jesús llote:

—Omoi llofuera inimona bie jai cacadomoi. Moisés micori jaie llote: “Ie aina bu dotaacania, naiñaiño mo dotajacanabena fecaja”. Iedo jai jaicabidomoi. Iena bu finoia, omoimona mare.

³² Jiaie rafue birui lloiticue. Jiaimie diga naiñaiño iñenia, ie aina bu dotajia, maraiñede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñona ie aina

illena bu ua mei, naimiedi jeacinona jai finode.
Jeacino finoñellena, aina dotaño.

*Jesúdi Jusiñamui mameci jamai ebena linoñenana
lua rafue*

³³⁻³⁵ Jesús lloté:

—Omoi llofuerañimona bie jai cacadomoi.
Moisés micori omoi jaiagaimo lloté: “Taino
lloño; ia Jusiñamuimo omoi lloga uaina fino”.
Iedo jai jaicabidomoi. Omoi lloga uai omoi
finollena jiaie comini uiñollena, Jusiñamui
mamecina llinotomoi. “Iena cai linoia, cai lloga
uaina cai finoñenia, Jusiñamui caina duere finoite”
raitomoi. Jusiñamui mameci omoi linoñenia,
omoi lloga uai omoi finoñenia, omoi mona mare.
“Jusiñamui caina duere finoñeite” raitomoi.
Iemona monamo ite ra mamecina jamai
ebena llinotomoi. Eniruemo ite ra mamecina
jamai ebena llinotomoi. Jerusalén railla nairai
mamecina jamai ebena llinotomoi. Omoi ifogi
mamecina jamai ebena jiai llinotomoi. Jusiñamui
mamecina jamai ebena linoñedomoi; ia jiaie
ra mamecina jamai ebena llinotomoi. Ero,
monamo ite ra mamecina omoi linoia, Jusiñamui
mamecina jiai llinotomoi, nainomo ie illano
illa jira. Eniruemo ite ra mameci omoi linoia,
iena Jusiñamui finua jira, iena naimie sedaja jira,
naimie mamecina jiai llinotomoi. Jerusalén railla
nairai mamecina omoi linoia, Jerusalén naimie
nairaina jira, naimie mamecina jiai llinotomoi.

³⁶ Omoi jitirede ifotiraina usere omoi jaitanina
jira, omoi userede ifotiraina jitire omoi jaitanina
jira, omoi ifogi mameci jiai linoño. Dama

Jusiñamui iena usere itataja jira, dama naimie iena jitire itataja jira, ifotirai mamecina omoi llinoia, Jusiñamui mamecina jia llinotomoi.

³⁷ Ie jira Jusiñamui mameci jamai ebena llinoñeno. Jiaie ra mameci jamai ebena llinoñeno; iadedi nie isoide rafuena omoi finoia, omoi lloga uaina taino lloñeno fino. Uanaicinona jaca llono. Uanaicinona omoi lloñenia, Taifemona omoi uaina otomoi.

*Jesúdi iba oñenana llofuia rafue
(Lc 6.29-30)*

³⁸ Jesús llote:

—Omoi llofuerañimona bie jai cacadomoi. Moisés micori jaiie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoi;

³⁹ iadedi birui omoimo lloticue: Ibana oñeno. Marañede rafue finodimiemona omoi abina riidoñeno. Omoi cacaina naimie dutaia, naimie diga iciriñeno. Enefebeimo omoi uieco dobaño, enefebei omoina naimie dutallesa. Naimie omoina duere finoia, ibana oñeno.

⁴⁰ Omoi iniroi bairollena omoina bu llogidoia, juez nia omoimo lloñenia, naimie jitailla iniroi baifemo naimiemo feca.

⁴¹ Daje kilómetro naimaci raruiái omoina uil-lana illaicomini ocuia, iena uiño. Nibai omoi comeci jitañede; ia naimacina canollena, iena mena kilómetros uiño. Naimaci ocuilla baifemo uiño.

⁴² Omoimo ite rana bu jicaia, iena caidiñeno. Omoï rana bu jamai jicuano uia, abido atillena, iena caidiñeno feca.

*Jesúdi omoïna gaiñenano isiruillena llua rafue
(Lc 6.27-28, 32-36)*

⁴³ Jesús llote:

—Omoï llofueraïnïmona bie jai cacadomoï. Llotimaci: “Omoï comïnina isirui; iadedi omoï nairaiñedinona enoi”. Iedo jai jaicabidomoï.

⁴⁴ Omoïmo birui llotïcue: Omoï nairaiñedinona isirui. Omoï gaiñenanona isirui. Omoïna duere finodino facaina Jusiñamuimo jï. Naimaci começiaï iuai meiduana naimïemo jïcano.

⁴⁵ Jusiñamui comïnina omoï illamona, naimaci facaina jï. Ero, Jusiñamui nana comïnina daje isoi canode. Nana comïnina daje isoi isiruilla jira, naimiedi jitomana maraiñedinona lligaiñotade. Mareuidïnona jiaï lligaiñotade. Maraiñedinone dine noci deitate. Mareuidïno dine jiaï noci deitate.

⁴⁶ Naimie comïni omoï illamona, nana comïni daje isoi isirui. Omoïna isiruitïnona omoï isiruia, mare; iadedi omoïna gaiñenanona omoï isiruiñenia, Jusiñamui omoïna: “Mare” raiñeite. Maraiñede finoraini naimacina isiruitïnona isiruitimaci. Nana comïnina omoï isiruiñenia, maraiñede finoraini baiñemo faiñedomoï. Naimaci isoi itomoï.

⁴⁷ Dani omoï comïnina omoï uaidoia, mare; ia omoïna gaiñenanona omoï uaidoñenia, naimaci baiñemo faiñedomoï. Jusiñamuina ïnoñedinone baiñemo faiñedomoï. Naimaci isoi itomoï.

⁴⁸ Iena omoï uiñuamona, omoï Moo Jusiñamui finua isoi, mare rafuena finocana omoï jai.

6

Jesúdi mare rafue finuana llua rafue

¹ Jesús llote:

—Omoína nia llofueiticue. Jiaie comini iena cioillena, mare rafuena omoi finoiadedi, omoína: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñoeno, iena jiaie comini jamai cioillena. Iena ja ñaiticue.

² Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañoeno. Ofiracomo maredinona abi caitadino isoi omoi iñoeno. Naisomo maredino abi caitadino isoi iñoeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci.

³ Dueredinomo rana omoi fecaia, jiaie cominimo iena lloñoeno.

⁴ Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoi. Omoína: “Mare” raite.

Jesús Jusiñamuimo jia rafue

(Lc 11.2-4)

⁵ Jesús llote:

—Jusiñamuimo omoi jüia, maredinona abi caitadino isoi omoi iñoeno. Ofiracomo naimacina comini cioillena, marefodo jüidimaci. Jüicabilla facaiseconi naisomo naimaci ia, naimacina comini cioillena, marefodo jiaí jüidimaci. Naimacina: “Jusiñamuina eo sedadimaci” comini raillana jitaidimaci. Cominimona iobillacinona birui jai feiñotimaci.

⁶ Omoï j#acania, omoï jofomo fo jai. Nainomo Jusiñamuimo anado omoï j#. Iena Jusiñamui uiñuamona, omoï j#caca rafue naimiemona feiñoitomoï.

⁷ Jusiñamuimo omoï j#ia, naimiena #noñedino isoi jamaicinona ñaiñeno. Naimaci comecina facadimaci: “Daje j#racinona diga icaiño cai j#ia jira, ja muidomo cai Moo caina raise cacaite”.

⁸ Naimaci isoi iñeno. Nia omoï j#añenia, naimie omoï jitaille rafuena uiñote.

⁹ Naimiemo omoï j#acania, iese j#:

Ore Moo, monamo itio.

Comini ori iobidesa.

¹⁰ O illaimana jira, nana cominina o anamo raire itata.

O jaienisaï o jitaillacinona finua isoi, cominina o jitaillacinona finota.

¹¹ Nagarui guille caïmo itata.

¹² Caina jeare jiaïno finoia, iena caïmona feilla isoi, cai jeacinona omona feilla jira, cai jeacinona oni dota.

¹³ Caïmo ramo bu faia, caina cano, iena cai #noi raillano. Jeacinona finuamona caina jillota. Iese omoï j#.

¹⁴ Omoïna jiaïe comini jeare finoia, iena omoï feitaia, omoï monamo ite Moo omoï jeacinona iena feitajanona, jiaï oni dotaite;

¹⁵ iadedi jiaïe comini finoca jeacinona omoï feitañenia, omoï Moo Jusiñamui omoï jeacinona feitañeite. Iena oni dotañeite.

Jesús guiñenaruina llua rafue

¹⁶ Jesús llote:

—Omoina nia llofueiticue. Raitomoï: “Jusiñamuina eo raise cai sedajanona, birui cai guiñeiticai. Iemona naimie caina eo duenaite” raitomoï. Iese Jusiñamuina omoï sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uiñollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci.

¹⁷ Ero, naimaci isoi omoï iñeno; iadedi omoï guiñenarui ia, omoï abiaï raise fino.

¹⁸ Iemei cominidi omoï guiñenarui illana uiñoñeitimaci. Naimacimona iobillacinona feiñoñeitomoï. Dama Jusiñamui iena uiñoite. Bainino omoï finoca rafue naimie uiñua jira, naimiemona iba feiñoitomoï.

*Jesúdi Jusiñamuimo comecina facaja rafue
(Lc 12.33-34)*

¹⁹ Jesús llote:

—Omoï jofomo ailluena rana eenocana uiñeno. Gireco iena guicabite. Dajerie ra nemuide. Omoï jofomona jiaie comini iena fiicadimaci. Ailluena ra eenuamo omoï comeciaina facañeno;

²⁰ iadedi Jusiñamui dine monamo omoï ra illa isoi, iemo omoï comeciaina faca. Naimiemo comeciaina cai facajamona, nainomo cai iobillacino iite. Girecuaimona, nemuillamona, firirainimona, iena nainomo faifiñeitomoï.

²¹ Aillue ra omoïmo ia, Jusiñamuimo comeciaina facañedomoï; iadedi naimie jitaillacinona omoï finoia, naimiemo comeciaina facadomoï.

*Jesús cai comecina llua rafue**(Lc 11.34-36)*²²⁻²³ Jesús llote:

—Cai uisi diga rana ciodicai. Cai uisi maraiñenia, rana raise cioiñedicai. Ie isoide. Cai comeci maraiñenia, maraiñedicinona finocana jaidicai. Jusiñamuina uiñoñedicai. Ie rafuena jiai uiñoñedicai. Naimiena nabaiñedicai.

*Jesús raruiaina llua rafue**(Lc 16.13)*²⁴ Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baiñefemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiai ollemo comecina omoi eo facaia, Jusiñamui jitaillacinomo comecina raise facañeitomoi.

*Jesúdi Jusiñamui cai sedajana llua rafue**(Lc 12.22-31)*²⁵ Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite.

²⁶ Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baiñefemo omoi faia jira, naimie omoina canoite.

27 Omoimona, ¿bu ie comeci jarire facajamona a sairite? Iese jaca buna a sairine. Dama Jusiñamui omoina a sairitarede.

28 ¿Bue ñellena iniroimo jarire comecina facadomoi? Safiamo omoi comecina faca. ¿Ñiese sicodimaci? Maiñinedimaci. Iniroina tifornedimaci;

29 iadedi Salomón micori naimaci isoi jaie inede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide.

30 Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo inroidi jaca iite. Omoi ra omoimo illena, naimiena ino.

31 Omoi comeci jarire finoñeno. “¿Buena guiticaí? ¿Buena jitaiticaí?” rañeno. Iemo comeciaina eo facañeno.

32 Jusiñamuina inoñedino iemo comecina facacabidimaci. Nana omoi jitaillacinona omoi Moodi uiñua jira, naimaci isoi ineno.

33 Jusiñamui anamo raise omoi i. Naimie jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo iite. Iniroi omoimo iite.

34 Jusiñamui omoi birui jitailla ra omoimo iite. Iena uiñuamona, jairuido suille rafuemo jarire comecina facañeno. Ico omoi jitailla ra omoimo jiai iite.

*Jesúdi jiaie cominina mameriñenana llua rafue
(Lc 6.37-38, 41-42)*

¹ Jesús llote:

—Omoína nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoína duere finoite.

² Jiaie cominina omoi mamerilla diese Jusiñamui omoína duere finoite.

³ Omoi ecimo itimiemo janore maraiñedicino illana omoi uiñoia, iemo comecina facañeno; iadedi omoimo ailluena ite maraiñedicinomo nano omoi comecina faca.

⁴ Omoimo maraiñedicino illamona, ¿niese omoi ecimo itimiena mameritomoí?

⁵ Omoimo ite maraiñedicinomo omoi comecina facacaiñena jira, maredinona abi caitadinomoi. Omoi comeciaina nano raise fino. Iemei omoi ecimo itimiena canorenitomoí. Naimie comecina raise canorenitomoí.

⁶ 'Ero, eo mare rana omoi jiconiaino fecañeno. Eo raifide rana omoi chanchuaino fecañeno. Naimacimo omoi fecaiadedi, iena feiñoñeitimaci. Omoína gaiñenamona, jiconiai omoína ainitimaci. Chanchuai iena jamaillamona, iena saitaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoi llocabia, omoína duere finoitimaci. Omoi rafuena jamaitimaci.

*Jesúdi cai jitailla ra jicaja llua rafue
(Lc 6.31; 11.9-13)*

⁷⁻⁸ Jesús llote:

—Daje ra omoï faifia, iena jenodomoï. Raise jenoia, iena baitomoï. Damïena omoï jenoia, naimïe illanomo jaidomoï. Nainomo naimïena baillamona, omoïna feiñoite. Ie isoide. Buena omoï jitaia, Jusiñamui jica. Iena omoï jicaja jira, iena naimïe cacajamona, omoïmo iite.

⁹ Ero, omoïmona naimïemo llomeniconna ie moomo ie jito jicaia, noficina fecañede.

¹⁰ Lliciaina jicaia, jaiona fecañede.

¹¹ Jeacinnona finocabidomoï; iadedi mare ra omoï uruiaïmo fecacabillana uiñoïtomoï. Cai Moo Jusiñamuidi jaca mareuidimïe. Cai baifemo naimïe faite. Ie muidona naimïemo jicanotïnomo mare rana fecaite.

¹² 'Jusiñamui jitaillacinnona omoï finuamona, jiaie cominina marena fino. Jiaie comini omoïna finuana omoï jitailla isoi, naimacina fino. Naimaci omoïna marena finuana omoï jitaia, naimacina marena fino. Naimaci omoïna maraiñoïno finuana omoï jitaia, naimacina ie isoi maraiñoïno fino. Moisés micori ie isoidicinnona jaie llofueï. Jusiñamui facaina lloraini micoriai ie isoidicinnona jaie jiaï llofuetimaci.

Jesúdi Jusiñamui ñine rille llua rafue

(Lc 13.24)

¹³⁻¹⁴ Jesús llote:

—Jusiñamui ñine omoï rillena, janorede naisodo omoï jailla isoi isoilla. Naisomo ite nasedi janorede isoide. Naimïe ñine naie rilla jira, naiedo omoï jai. Nainomo jaidino jaca iitimaci. Naimïe ñine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiaï

aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

Jesúdi abi caitadinomona abi rairuillana llua rafue

(Lc 6.43-44)

¹⁵ Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoina jifueiacadimaci. Naimaci llofuiacinodo omoi jaia, Jusiñamui rafuedo raise jaiñeitomoi.

¹⁶ Naimaci lloga rafuemona naimaci Jusiñamui llorainiñenana uiñoitomoi. Ero, eecuaïmona uvas raila riarã oñega. Eecuaïmona higos raila riarã jiaï oñega.

¹⁷ Mare riarãmona mare llisilla comuide. Maraiñede riarãmona maraiñede llisilla comuide.

¹⁸ Mare riarãmona maraiñede llisilla comuiñede. Maraiñede riarãmona mare llisilla comuiñede.

¹⁹ Mare llisilla comuitañena jira, naga maraiñede riarã jaitaca, iena jobaillena.

²⁰ Ie isoide. Naimaci finoca rafuemona nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusiñamui naimacina duere finoite.

Jesúdi ie Moo ie comini sedajanomo ille llua rafue
(Lc 13.25-27)

²¹ Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi

dama cue Moo jitaille rafue finodimiedi nainomo iite.

²² Cominimo juez isoi Jusiñamui ioco llua facaisec-
oni, diga cominidi cuemo lloitimaci: “Nama, caina
o oretatio cai raillamona, o rafuena llocabiticai.
O uaido jananiaina oni oredicai. O uai diga siño
rafuena finodicai” lloitimaci.

²³ Uai oiticue: “Omoina uiñoñedicue. Cue
comiñedomoi. Jecino omoi comecimo nia illa
jira, cuemona oni omoi jai. Cue Moo ie comini
sedajanomo jaca iñeitomoi”.

*Jesúdi naimiena iñuana ñaia rafue
(Lc 6.47-49; Mr 1.22)*

²⁴ Jesús llote:

—Cue llwana cacadomoi; iadedi omoimona
nana iñoñedomoi. Cue llwana iñotimiedi abi
uiñotimie. Jofona raise finodimie isoide. Jofona
raise finodimiedi ie jofona finodemo, jofona
goiñellena, nofici illa dinori eo ana raite.

²⁵ Noci deidemo, eo jinuidemo, jofomo ille toia,
aifi bitemo, jofa raise finua jira, jofa goiñede. Iena
faifiñede. Ie isoide. Cue llwana iñotimie faifiñeite.

²⁶ Cue llwana iñoñedimiedi abi uiñoñedimie.
Jofona raise finoñedimie isoide. Jofona raise
finoñedimiedi ie jofona finodemo, conillie emod-
omo iena finode. Ana raiñede.

²⁷ Noci deidemo, eo jinuidemo, jofomo ille toia,
aifi bitemo, jofa goillamona, jai eo judaisite. Iena
faifide. Ie isoide. Cue llwana iñoñedimie faifite —
llote.

²⁸⁻²⁹ Moisés micori rafue uiñoraini isoi naimie
llofueña jira, illaimamo ite uai itimie isoi naimie
llofuia jira, nainomo ite cominidi naimie lluari
raijicaidimaci.

8

*Jesúdi efonaitimiena jillotaja rafue**(Mr 1.40-45; Lc 5.12-16)*

¹ Naimie llofuia mei, anedumona Jesús ie llofueoicaigano diga ana bite. Ailluena comini naimiena racadimaci.

² Efonaitimie naimie dine billanona, naimiena raise uaiduamona, caiñici ifodo ana rainadate. Raite:

—Maestro, o jitaiadedi, cuena jillotaredio.

³ Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo. —Iecon naimie jillode.

⁴ Jesús naimiemo llote:

—O jilluana bumo lloñeno; iadedi Jerusalémo, Jusiñamui jofomo, Jusiñamui diga ñairaima dine mai jai. O jilluana comini raise uiñollena, naimiemo o abina acatajai. Moisés micori jaie lloga rana Jusiñamuimo feca. —Iemei Jesús oni jaide.

*Jesúdi capitán mullaimana jillotaja rafue**(Lc 7.1-10)*

⁵ Capernaum railla nairaimo Jesús ria, capitán raillamie naimie dine bite. Naie capitán Roma railla nairai imie. Judíuñedimie. Billanona, duere llote:

⁶ —Maestro, cuena cano. Cue jofomo cue mullaima ite. Ie abina niraídanide. Naimie abi eo isirede. Naimiena jillota.

⁷ Jesús uai ote:

—Naimie dine jaiticue, naimiena cue jilloitalena.

⁸ Naie capitán dane llote:

—Jaiño. Jamai bue isoidicue. Iemo, ¿niese cue jofomo biitio? O uaido bene lluanona cue mullaïma jilloite.

⁹ Jiaie illaicomini anamo iticue. Naimaci lloga uaina ñnoticue. Cue anamo jiaie soldaduai illanona, cue uaina ñnotimaci. Cue anamo cue mullaïma illa jira, naimiedi cue uaina ñnote. O anamo naie duico illa jira, o uaina o lloia, cue mullaïma jilloite.

¹⁰ Iena cacajanona, Jesús rajicaide. Naimie diga jaidinomo llote:

—Bie isoi cue uaina ñnotimiena jaca baiñedicue. Cai judíuai cominimona biesedimiena jaca ññede.

¹¹ Ero, Jusiñamui ie cominina sedajanomo naimaci illena, diga judíuaiñedino cue llua uaina ñnoitimaci. Naga nairaïmona ñnoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci.

¹² Ailluena judíuaiñedino ñnoitimaci. Jusiñamui ie cominina sedajanomo duillanodi omoi judíuai. Naimiena omoi ñnoñena jira, omoïna oni dotaite. Dotaja mei, eo duere sefuillamona eetomoi.

¹³ Capitámo Jesús llote:

—Mai jai. Cue uai siñonana o ñnua jira, o jitailla rafue omo jai suide. —Ieconï naimie mullaïma jillode.

*Jesús Pedro jifaiñoña jillotaja rafue
(Mr 1.29-31; Lc 4.38-39)*

14 Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride.

15 Naiñaiño dine jaillanona, naiñaiñoña jetade. Jetajamona ieconi naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mr 1.32-34; Lc 4.40-41)

16 Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate.

17 Naimacina Jesús jillotajamona, Isaías micori jaie ciegafuiaie iese jai suide. Naimie micori jaie cueba: “Caína jilloitajanona, cai duiconona oni oretate”.

Jesús ie llofuegamiena damie jaillana ie rafue

(Lc 9.57-62)

18 Ailluena comini naimie ecimo illana Jesús cuanona, ie llofueoicaiganomo ruica dine jaillana llote.

19 Ieconi Moisés micori rafue llofueraima naimie dine billanona, llote:

—Maestro, o jaillinomo o diga jaiacadie. O llofuegamiena jaiacadie.

20 Jesús uai ote:

—Janorede ocainaiadi joforedimaci. Silliniaie jillainiaredimaci; iadedi jofonidie. Monamona billanona, imana jaidie; iadedi buenidie. Jofonidie. Cue diga o jaiacania, bue isoidena cuemona oñeitio. Iemo o comecina raise faca.

21 Ie facaise jiaie llofuegamie Jesúsimo llote:

—O diga jaiticue; ia cue moo nia fiodañena jira, o diga nia jaiñeiticue.

²² Jesús naimie uai ote:

—Cue diga idai mai bi. Cuena ñnoñedinodi o mooná canoredimaci. Naimie fiodaia, naimiena naimaci raille. Cue rafue jiaie rafue baifemo faite. Cue diga mai bi.

Jesúdi joraina llícaitaja rafue

(Mr 4.35-41; Lc 8.22-25)

²³ Naie llofuegamie diga Jesús ñaia mei, ruica ñine jaillena, botemo jaide. Ie llofueoicaigano jiaí jaidimaci.

²⁴ Botemo jailla mei, Jesús ñinde. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira,

²⁵ jaciruillamona, Jesúsna casitatimaci. Raitimaci:

—Maestro, cana cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cuena raise ñnoñedomoi. Jacinañeno.

Iemei Jesús naidacaillano, aifina lletade. Joraina jiaí llícaitade. Ieconi llícaide. Bagoñede.

²⁷ Naimie llofueoicaigano iemona raijicaidimaci. Iemona raitimaci:

—Bimiedi, ¿ñie isoidimie? Aifi naimie uaina ñnote. Jorai naimie uaina jiaí ñnote.

Bai jaillanona, ruica ñine ridimaci.

Jesúdi Gadara railla eniruemo illa rafue

(Mr 5.1-20; Lc 8.26-39)

²⁸ Ruica dñe naimaci ridemo, Gadara railla eniruemo sijidimaci. Ieconì menamie Jesús dñe bitiaimaiaì. Jananiaì anamo ite iaìmaiaì. Comini raoillanomo nofie moto ifuaìmona bitiaìmaiaì. Nai iaìmaiaì eo rìrena jira, jaca bu nainomo jainide.

²⁹ Jesúna iaìmaiaì ciua facaise jananiaì iaìmaiaìna cuirioitate:

—Jusiñamui Jitodio. ¿Niese cocona nìbaìacadio? Coco duere sefuille facaise nia iñede; iadedì birui cocona duere finuaìbidio —cuiroidiaìmaiaì.

³⁰ Naie bai iaìre ailluena chanchuai guillano itimaci.

³¹ Jananiaì Jesúmo duere llotimaci:

—Oni caina o oretajanona, chanchuai abìmo caina oreta.

³² Jesús uai ote:

—Mai jai.

Ieconì nai iaìmaiaìmona jananiaì oni jaillanona, chanchuai abìmo jaide. Iemona iconiaìdo chanchuai joraimo aisìcana jaillanona, corobaiside.

³³ Iena ciuanona, chanchuai sedarainì imaci nairai dñe aisìcana jaidimaci. Nana naie rafuena llotimaci. Jaive jananiaì anamo illa iaìmaiaì rafuena llotimaci.

³⁴ Ie jira ailluena comini Jesús dñe bitimaci. Naimièna ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

9

*Jesús tìsitaitimièna jillotaja rafue
(Mr 2.1-12; Lc 5.17-26)*

¹ Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride.

² Nainomo rilla mei, naimie dine comini ie biramo biide tisitaitimiena atide. Naimiena atidinodi Jesús naimiena jillotajana innote. Iena Jesús uinuanona, tisitaitimie mo llofe:

—Moo, o comecina ocuiño. O jeacino cue feitaja jira, iena jai oni dotadicue. Ie facai ibana jai oñeiticue.

³ Jesús dine ofidinomona dajerie Moisés micori llogacinona llofueraini itimaci. Jesús llua naimaci cacajano, Moisés micori llogacinona llofueraini comecina facadimaci: “Dama Jusiñamui jeacino dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

⁴ Naimaci comeciaina facajacinona Jesús uinuanona, Jesús dinena jicanote:

—¿Bue ñellena omoi comecina jeare facadomoi?

⁵ Bimie mo: “O jeacino jai oni dotadicue” cue lloia, cue uai siñonana uinñoñeitomoi; ia bimie mo: “Mai naidacaillanona macari” cue lloia, cue uai siñonana uinñoitomoi.

⁶ Monamona jae cue billanona, imana jaidicue. Ie jira jeacino oni dotaja uai cuemo ite. Iena omoi uinñollena, tisitaitimie mo lloiticue: “Mai naidacai. O bira ferianona, o jofomo mai jai”.

⁷ Iese naimie raillamona, tisitaitimie jillode. Naidacaida, ie jofomo jaide.

⁸ Comini iena ciuanona, jacinaitimaci. Bimie mo ie uaina Jusiñamui fecajana naimaci uinuanona, Jusiñamuimo iobillacinona fecadimaci.

*Jesúdi Mateona fetua rafue
(Mr 2.13-17; Lc 5.27-32)*

⁹ Jesús bai macaritemo, cuena ucubena oranomo cue raillana cide. Mateodicue. Gobierno ucube oraimadicue. Jesús cuemo llote:

—Cue llofuegamiena o jaillena, cue diga bi.

Naidacaida, naimie diga jaidicue.

¹⁰ Nailli cue jofomo Jesús ie llofueoicaigano diga guite. Diga gobierno ucube oraini jiai guisaibitimaci. Diga Moisés micori llogacinodo jaiñedino jiai guisaibitimaci.

¹¹ Nainomo fariseuai comini jamai bitimaci. Moisés micori llogacinodo eo jaidimaci. Jesúna cianona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Moisés micori llogacinodo ucube oraini raise jaiñenamona, naie isoidino diga, fariseuai comini nabairiñena jira, iese jicanoitimaci.

¹² Iena cacajano, Jesús llote:

—Ecairedinodi médiconona jitañedimaci; ia duidinodi médiconona jitaidimaci. Ie isoide. Mareuidino cuena jitañedimaci; ia maraiñedino cuena jitaidimaci.

¹³ Jusiñamui facaina lloraíma micori jaie cuega rafuemo omoi começaina faca: “Jusiñamui llote: ‘Rana cuemo omoi fecajana jitaidicue; ia cominina omoi dueruillana jiai jitaidicue’ llote”. Cominina cue dueruilla jira, Jusiñamui dibeimo naimaci illena, mareuidinona itatajaibiñedicue; iadedi Jusiñamui dibeimo naimaci illena, maraiñedinona

itatajaibitícue. Omoimona maraiñedino diga nabairitícue; ia naimacina uaibitícue.

Jesús dine Juan Bautista llofueoicaigano billa rafue

(Mr 2.18-22; Lc 5.33-39)

¹⁴ Naie facaise Juan Bautista llofueoicaiganodi Jesús dine bite. Naimiemo llote:

—Cai einamací llua isoi, Jusiñamuina cai raise iobitallena, guiñenaruillai illa facaiseconi guiñedicai. Cai jeacino facaina sunaicabitícaí. Fariseuai comíni jiaí guiñedimaci; iadedí o llofueoicaigano guitimaci. Cai einamací llogacínodo jaidícaí. ¿Bue ñellena o llofueoicaigano iedo jaiñedimaci?

¹⁵ Jesús uai ote:

—Jiaie rafuedo iena lloiticue. Coniruedí ie aina uarui ia, iobilla jira, ie nabaiñiaí sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidí iite. Ie isoide. Cue comíni diga biruí cue illa jira, iocire itimaci. Ico cue jaille mei, sunaitimaci. Ie muidona biruí cue llofueoicaigano guicabitimaci.

¹⁶ Jiaie rafuedo iena lloiticue. Nia jocoñega comue iniroidí jacaie iniroimo jilliñega. Jilliadi, jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite.

¹⁷ Jacagomona finoca bolsa como finoca vino joneñega. Jonegadena, mairiñena jira, sirillamona, igoí raire cuararite. Vino faifite. Igoí jiaí faifite. Como finoca vino comogomo jonelle. Iemei iena faifíñeite. Ie isoide. Omoí einamací rafue ifomo

jiaie rafue birui ite. Iena omoimo llocabiticue. Iedo jaidicai —llote.

*Jesúdi mena duide riñona jillotaja rafue
(Mr 5.21-43; Lc 8.40-56)*

¹⁸ Juan Bautista llofueoicaigano diga Jesús llotemo, jiaimie naimie dine bite. Naimiedi judíuai ofiraco sedaraima. Jesúna duere jicanollena, caiñici ifodo rainadacaida llote:

—Cue jisa como fodaite. O onolli naiñaiño o jonellesa, naiñaiño jilloillesa, cue jofomo cue diga mai bi.

¹⁹ Iena cacajano, Jesús naimie diga jaide. Ie llofueoicaigano jiai jaidimaci.

²⁰ Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade.

²¹ “Naimie iniroi cue jetajamona jilloiticue” comecina facajamona, naiñaiño naimie iniroina jetade.

²² Ieconí Jesús dobaidacaida, abido erodatemo, naiñaiño cide. Raite:

—Ñoo, o comecina ocuiño. Cuená o inua jira, jai jillodio.

Ieconí naiñaiño jillode.

²³ Ofiraco sedaraima jofomo Jesús rillano, naie jofo nama jisa jai fodailla jira, comini merire fillana cacade. Ailluena failliñailana cacade.

²⁴ Jesús dinena raite:

—Jofomona nana omoi jino jaillana jitaidicue. Cuemona biñaiño fodaiñedesa. Jamai inide.

Iena cacajano, naiñaiño jai fodaite uiñuamona, Jesúri jaisitimaci.

25 Comini jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide.

26 Naie rafue nana naie enirue itinomo llocana jaide.

Jesúdi uisínide iaímaiaína jillotaja rafue

27 Ofiraco sedaraima jofomona Jesús bai jaidemo, uisínide iaímaiaí naimie jinafona jaidiaímaiaí. Jesúna ado uaidotiaímaiaí:

—Cai illaima David micorí jitodio. Jusiñamuimona o billa jira, cocona duenai.

28 Uai oñeno Jesús Capernaumo jaide. Naimie fo jailla mei, naimie dine bitiaímaiaí. Iaímaiaímo Jesús jicanote:

—¿Omicona cue jillotajana inotomico?

Fairiotiaímaiaí:

—Jii.

29 Iaímaiaí uisina Jesús jetajano raite:

—Cuenamico inua diese jilloitomico.

30 Ieconiaímaiaí uisidí cide. Jesús naie rafuena lluana eo janotade.

—Bumolloño —llote;

31 iadedí iena llocana jaidiaímaiaí. Iemona Jesús mamecí nana naie eniruemo itinomo soride.

Jesús ñaiñedimiena jillotaja rafue

32 Capernaumona Jesús bai jaidemo, naimie dine Janaba anamo illamiena jiaie comini atidimaci. Janaba anamo naimie illa jira, naimie ñainide.

33 Jesús Janabana oni orede. Oretaja mei, naie iima ñaite. Nainomo ite comini raijicaillanona raitimaci:

—Cai comini dine bie isoide ima jilluana jaca cioiñedici.

³⁴ Ie jira fariseuai comini dinena raitimaci:

—Taife dibeimo Janaba illamona, Jesúsdi Taife uaido Janabana oni orede —raitimaci.

Jesúdi cominina duenaila rafue

³⁵ Diga nairaiamo ie llofueoicaigano diga Jesús llocana jaide. Nainomo judíuai ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci começiai iuaina meiduana llofueite. Ailluena duidinona jillotate. Naga isoide duicomona jillotate.

³⁶ Naimacina duenaite. Naimaci começiai iticino oni duiñoitimie iñena jira, naimacina duenaite. Ailluena cominina cide. Toica llaudaiai isoi ebe isoi jaidimaci. Naimaci começiai ocuiñonidimaci. Jusiñamui naimacina sedaacana uiñoñedimaci.

³⁷ Naimacina duenailamona, ie llofueoicaiganomo llofe:

—Illimo ailluena trigo ia, iena ollena, ailluena maijirainina jitailla. Ie isoide. Ailluena comini ite naimacimo Jusiñamui rafuena cai lollena; iadedi naie rafuena lloraini eo iñedimaci.

³⁸ Ie rafue naimaci lollena, ailluena cominina raire naimie oretallena Jusiñamuimo jicano.

10

Jesúdi ie doce llofueoicaiganona fetua rafue (Mr 3.13-19; Lc 6.12-16)

¹ Ie doce llofueoicaiganona Jesús uaiduanona, naimacimo ie uai iñonocaide, jananiai anamona

cominina jilloitallena. Duiconona oni oretallena, iena jiaí iñonocade.

² Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaiaí Zebedeo jito iaimaiaí.

³ Felipe. Bartolomé. Tomás. Cuenajiaí uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo.

⁴ Jiaie Simón. Naimiedi cananista comini fa-caisemo duide. Judas Iscariote micori. Naimiedi Jesúna gaitatate.

*Jesúdi ie llofueoicaiganona oretaja rafue
(Mr 6.7-13; Lc 9.1-6)*

⁵ Jesús ie llofueoicaiganona oni oretajanona, raite:

—Judíuaiñedino dine jaiñeno. Samaritano railla comini dine jaiñeno;

⁶ ia cai judíuai comini dine jai. Naimacimona ail-luena comini Jusiñamui rafuena nia iñoñedimaci. Faificana nia jaidimaci.

⁷ Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciaí iuaina meido”.

⁸ Duidinona jillota. Fiodaitinona jillota. Efontinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno.

⁹ Ucubena uiñeno. Guille ifo meidollena, rana uiñeno.

¹⁰ Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona

uiñeno. Omoï abi riidollena, jiguidana uiñeno. Jiaie cominina omoï canua isoi, omoïna naimaci canua. Naimacimona omoï jitailla rana omoï ono. Ie jira ailluena rana uiñeno.

¹¹ Nie nairaimo omoï ria, omoï rafuena jitaïmiena jeno, naimie jofomo omoï illena. Naie jofomo omoï i, naie nairaimo omoï ille dinori.

¹² Naie jofomo omoï rillanona, naie cominina marena uaido.

¹³ Omoïna naimaci raise feiñoia, naimaci uri illena, naimacimo marecinona lloño; iadedi omoï rafuena naimaci jitaïñenia: “Jusiñamui omoïna canoite” naimacimo lloñeno.

¹⁴ Omoïna bu feiñoiacaiñenia, omoï uaina bu cacarefiacaiñenia, naie nairaimona omoï jaillanona, omoï eilliaimo ite jearacuaina jaidino. Maraiñede rafuena naimaci finuana naimaci uiñollena, omoï eilliaina jaidino.

¹⁵ Omoïmo uanaicinona lloticue. Omoïna naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoïna comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuillifuea llua rafue

¹⁶ Jesús ie llofueoicaiganomo nia llote:

—Naimacina janallari fañellena, naimaci duere sefuñellena, toica llaudaiai raise sedajana jitaïdmaci. Ie isoide. Eo maraiñede comini motomo omoïna oretaiticue. Omoïna duere finoacanitimaci. Raise sedajana jitaïdomoi. Jaio

fiodaiñellena, aiside. Naimiena bu meineñellena, ie abina eenollena, jaio aiside. Ie isoi omoi abi uiñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i.

17 Abina rairui. Dajerie omoina llogidoitimaci. Omoina gaitaja mei, naimaci ofiracomo omoina faitimaci.

18 Cue rafue omoi llua muidona, omoina gaitajanona, illaicomini dine omoina uitimaci. Omoina llogidoitinomo cue rafuena lloito moi. Naie illaicominimo iena jiai lloito moi.

19 Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uiñoitomo i.

20 Dani omoi comeciai icinodo ñaiñeitomo i; ia Jusiñamui Joreño uaido ñaitomo i.

21 Cuen a ñnotomo i; ia ailluena cuena ñnoñeitimaci. Cuen a omoi ñnua jira, omoina enoitimaci. Iemon a dajerie ie amana meinetallena, naimiena llogidoite. Dajerie moodi ie uruena meinetallena, naimiena llogidoite. Dajerie uruiaidi naimaci moona, naimaci eina meinetallena, naimacina llogidoitimaci.

22 Cue muidona ailluena comini omoina enoitimaci; iadedi cue uaina fainonocaiñedime cue Moo diga monamo ja muidomo jaca iite. Naimiena jillotaiticue.

23 Cue rafue naimaci jitaiñenamona, omoina nie nairai duere finoia, dinomona cue rafuena llollena, jiaie nairaimo raire jai. Cue rafuena omoi llollena, diga judíuai illanuaimo nia jaitomo i. Nana naie comini nia ñnoñenia, Jusiñamui dinena dane abido biiticue.

24 Ero, ie llofueraima duere sefuia, ie llo-

fuegamie daje isoi duere sefuite. Ie eci illamie duere sefuia, ie mullaïma daje isoi duere sefuite.

²⁵ Ie isoide. Cue cominina omoi jaillamona, cue duere sefuia, jiaï duere sefuitomoi. Taife mameci jiaïci llinuanona, “Beelzebúdio” jiaïno cuena raitimaci. Iese cuena naimaci jeare ñaïa jira, cue cominina omoi illa jira, omoïna jiaï jeare ñaitimaci.

*Jesúdi jaciruiñeno llofuia rafue
(Lc 12.2-9)*

²⁶ Jesús nia llote:

—Cuena ñnoñedino omoïna jeare ñaitimaci; ia nana cue rafuena llocana omoi jailla jira, naimacina jaciruiñeno.

²⁷ Omoïmo rafuena anado jai lloticue. Iena nana cominimo marefodo llono. Ado llono.

²⁸ Omoi abina meineredimaci; ia omoi joreña meinenidimaci. Omoïna naimaci meineia, omoi joreño Jusiñamui ðine jaite. Iena uiñuamona, omoi meineiacadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño ðiga, iraimo dotarede.

²⁹ Omoïna duere finoacadinona jaciruiñeno. Ero mena janorede sillina fecadomoïna, eo janore ibaca; iadedi cai Moo Jusiñamui jitaiñenia, naimacimona daje fioidañede.

³⁰ Ero, niga ifotirai omoïmo illana Jusiñamui uiñote.

³¹ Naimiedi omoïna sedajana jiaï uiñote. Sil-liñiaï baifemo Jusiñamui isiruigaomoi. Omoi duere finoacadinona jaciruiñeno. Jusiñamui jitaiñenia, omoïmo jaca buena suiñeite.

*Jesús naimiena janoñenana llofua rafue
(Lc 12.8-9)*

³² Ie llofueoicaiganomo Jesús nia llote:

—Cue rafuena omoï llumona, jiaïno omoïna duere finoitimaci. Cuen a birui omoï janoñenia, nana comini Jusinamui uicomo ico ia, nainomo omoïna janoñeiticue. “Cue cominidomoi” omoïna raiticue.

³³ Cuen a birui omoï janoia, nana comini Jusinamui uicomo ico ia, nainomo omoïna janoiticue. “Cue cominiñedomoi” omoïna raiticue.

*Jesús muidona nana comini uri iñena rafue
(Lc 12.51-53; 14.26-27)*

³⁴ Ie llofueoicaiganomo Jesús nia llote:

—Nana cominina uri itatallena eniruemo biñedicue. Cuen a ñnoñedinodi cuena ñnotinona enoitimaci. Enoillamona cuena ñnotinona duere finoitimaci.

³⁵ Cue lloga rafuena damierie ñnua muidona, ie moo illa ñibeimo ie jito iñeite. Ie ei illa ñibeimo naiñaiño jisa iñeite. Ie jifaiño illa ñibeimo naiñaiño mio iñeite. Iese cominina uri itatañedicue.

³⁶ Omoï comini coninina enoitomoi. Iemona duere sefuitomoi.

³⁷ Ero, ie moona cue baifemo bu isirua, ie eina cue baifemo bu isirua, cue jitailla ra naimie finoacaiñena jira, cuemo raise ñuiñede. Ie uruai cue baifemo bu isirua, cuemo raise ñuiñede.

³⁸ Cue facaina bu fodiaicaiñenia, cuemo raise ñuiñede. Naimiedi cue comini naimiena lloiacaiñedicue.

³⁹ Cue facaina fodiaicaiñedimie ja muidomo faifite. Cue ñiga jaca iñeite; iadedi cue facaina fodaitimie monamo cue ñiga jaca iite.

Jesús Jusiñamuimona ibana feiñua llua rafue

(Mr 9.41)

⁴⁰ Jesús llote:

—Cue rafuena omoi llocana jaia, diga jofuemo riitomoi. Cue cominina omoi illamona, omoina feiñotino cuena jiai feiñotimaci. Omoina bu feiñoia, cuane jiai feiñote. Cuena feiñotimiedi cuena oretatimiena jiai feiñote.

⁴¹ Naimie cue comini illamona, damierie Jusiñamui facaina lloraimana feiñoitimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite.

⁴² Cue dibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite — llote. Iemei Jesús ie llofueoicaiganona, ie rafuena lollena, orede.

11

Jesús dine Juan Bautista micori ie llofueoicaiganona oretaja rafue

(Lc 7.18-35)

¹ Ie doce llofueoicaiganona Jesús oretaja mei, iaiei ite comini illanuaimo naimiedi ie rafuena llocana jaide.

² Ie facaiseconi cárcelmo Juan Bautista micori Jesús finoca rafuena fidiano, iena raise uiñollena, Jesús dine ie llofueoicaiganona orede.

³ Jesúsimo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uiñoiacadicai. Imieñedi odena, jiaimie billemo nia ocuridicai.

⁴ Jesús uai ote:

—Cue llwana cacadomoi. Cue finoca rafuena ciodomoi. Juan dine abido omoi jaillanona, iena naimiemo llono.

⁵ “Uisinidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiodaillamona damierie jai jillodimaci. Dueredino mare rafuena jai cacadimaci” naimiemo llono.

⁶ Jiai llono: “Ñibai nana cue rafuena raise cacaiñedio; ia cuena jaca nia inocana o jai, caimare iitio”.

⁷ Juan llofueoicaigano abido jailla mei, naimie ecimo ailluena ite cominimo Jesúsdi Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena começina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire furi bijide. Naimie ie isoñede. Nie isoide rafue naimiemo ia, cue rafuena llocana jaide.

⁸ ¿Bue ñellena naimie dine jaidomoi? Mare iniroina jítadimiena cioñedomoi. Mare iniroina jítadinona omoi cioacaniadedi, illaicomini dine jaidomoi.

⁹ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini

baifemo faite, cue billena omoimo naimie llua jira.

¹⁰ Malaquías micori naimiena jaie cuela: Jusiñamui raite: “Ero, o uicodo cue rafuena llo-lena, damiena oretaiticue, comini comeciaina marenona duiñollena” cuela. Malaquías Juan Bautistana cuete.

¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi.

¹² Juan llofua tainiamona ailluena comini cue rafuena inuamona, Jusiñamui dibeimo birui duere iacadimaci.

¹³ Nana Jusiñamui facaina lloraini micoriadi cue billena jaie llotimaci. Moisés micori iena jiai jaie llote. Juan facaise naie llogacino jai suide.

¹⁴ Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena inotomoidena, Juandi naimiena uñotomoi.

¹⁵ Omoi jeforena jira, raise fueollena, cue llamo cacarei.

¹⁶ Jesús nia llofue:

—Ero, omoina ñaiticue. Jifanote uruiái isoidomoi. Uruiai jifanoiacania, naimaci nabaiñiaina uaiduanona, raitimaci:

¹⁷ “Omoi diga jifanoiacadicaí; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicaí” raitimaci.

18 Ie isoidomoi. Juan jirorainide. Caimare guiñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci.

19 Monamona billanona, iimana jaidicue. Omoi isoi guiticue. Caimataidicue; ia cue diga nabairiñedomoi. Cuena jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimedio”. Iese raitomoi; iadedi Jusiñamuina inotinodi cue finoca rafuena marenana uiñotimaci.

*Dajerie nairai Jesúsna inoñena rafue
(Lc 10.13-15)*

20 Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uiñotimaci; iadedi naimaci comeciai iuai meidoñedimaci. Ie jira naimacina ñaite.

21 Llote:

—Omoimona damierie Corazín railla illanomona bitomoi. Omoimona damierie Betsaida railla illanomona bitomoi. Cue rafuena omoi inoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuaina meiduana uiñotallena, ebinide iniroina jitanonona, naimaci ifogiamo jusefona jonetimaci.

22 Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi.

²³ Omoimona damierie Capernaum railla il-lanomona bitomoi. Birui abina iedoiacadomoi; iadedi jiairuido sunaitomoi. Omoi dine navui cue siño finoca rafuena Sodoma railla nairaïmo jaie finodicuena, naie nairaïdi birui niadedi nia ite. Omoi comeciai iuai omoi meidoñenia, monamo cue Moo diga jaca iñeitomoi; iadedi naimie omoïna duere finollemona sunaitomoi.

²⁴ Jusiñamui uicomo nana comini ico ia, cue rafuena omoi ñnoñena jira, Sodoma railla nairaï baifemo duere sefuitomoi –llote.

*Jesús ie Moo diga ñaia rafue
(Lc 10.21-22)*

²⁵⁻²⁶ Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo fecaadicue. Mai.

²⁷ Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoïna naimiena uiñotadicue. Ie muidona naimiena uiñotomoi.

²⁸ Omoi jeacinomona omoi jillobillena, duere jaidomoi. Omoi comeciai marena uri illena, cue dibeïmo mai omoi i.

²⁹ Cue llucino anamo omoi i. Cue rinina jira, cuemona omoi fueo. Iemei omoi comeciai marena uri iite.

³⁰ Omoïna cue canua jira, cue llucino anamo omoi iacanano ia, sefuinide. Omoïna cue canolle jira, cue llucino finuana sefuinide.

12

*Sábadoruimo Jesús llofueoicaigano maijia rafue
(Mr 2.23-28; Lc 6.1-5)*

¹ Ie rafue llumona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naído jaide. Ie llofueoicaigano aimetailla jira, trigona tijiano, golluano, guicana jaidimaci.

² Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

³ Ie llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide.

⁴ Jusiñamuimo fecaca llomeniconu uanona, guitimaci. Jamai bue isoidino naie llomeniconu guillanu Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñede.

⁵ Moisés micori llogacinomo jiai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijuuidimaci. Jusiñamuina naimaci sedallena, ocainana fatimaci. Iraina bonodimaci. Iese maijuuidimaci; iadedi Jusiñamuimona jeacino

finoñedimaci. Moisés micori jaie cuezafuiaina raise cacaiñedomoi. Iena raise facañedomoi.

⁶ Omoimo nia lloiticue. Jusiñamui jofomo finoca rafue baifemo faiticue.

⁷ Jusiñamui facaina lloraima iena jaie cuela: “Cuemo rana omoi fecajana jitaicue; ia omoi jitaillamona, jaie cominina omoi duenailcinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedicinona finodomo” lloñedomoi. Cuemona cue llofueoicaigano jeacino finoñedimaci.

⁸ Monamona billanona, imana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

*Jesúdi onollina idisarodimiena jillotaja rafue
(Mr 3.1-6; Lc 6.6-11)*

⁹ Bai jaillanona, nairai dine rillanona, naimaci ofiracomo Jesús fo jaide.

¹⁰ Nainomo onollina idisarodimie illanona, fariseuai dinena Jesúmo jicanotimaci:

—¿Sábadoruimo bimiena o jilloitajana mare? — jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci.

¹¹ Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi.

¹² Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

13 Onollina idisarodimie mo lloite:

—O onolli mai oni ñuita.

Iena ñuitajamona jillode.

14 Iena ciuanona, fariseuai jino jaidimaci.
Naimiena meinellena, coniniri siadotimaci.

Isaías micori jaie Jesúna ñaia rafue

15 Naimiena naimaci meineiacanana Jesús
uñuamona, nainomona oni jaide. Diga comini
naimie diga jaidimaci. Naimacimona nana
duidinona jillotate.

16 —Cuenallocana jaiñeno —naimacimo lloite.
Naimie mameci are sorillana jitañede. Fariseuai
diga ie uai uaitaiacaiñede.

17 Iemona Isaías micori jaie ciegafuiai jai suide.
Jusiñamui Isaías micorina jaie cuetataga:

18 Ero, cue fetoca mullaima ite.

Naimiedi cue isiruigamie. Naimieri iobidicue.

Cue Joreño naimie mo cue fecajanona,
judíuaiñedinomo naimacina cue
jilloitaacanana lloite.

19 Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

20 Comeci ai ocuinidinona canoite.

Dueredinona canoite. Naimacina duere finoñeite;
ia naimacina canoite.

Ie mare rafue lluamona, naimiena ñnotinona
canoite.

Nana comini naimie anamo ille dinori iese naimie
canoite.

21 Naimaci jillobillena, ie rafue cacajanona, aillu-
ena judíuaiñedinona naimiena ñnoitimaci.

Fariseuai Jesúna jeare ñaia rafue
(Mr 3.19-30; Lc 11.14-23; 12.10)

²² Jesús dine damieriedi Janaba ie anamo illamiēna atidimaci. Janaba anamo naimie illa jira, naie aticamiedi cioñede. Jiai ñaiñede. Jesús Janabana oni oretajanona, naimiēna jillotate. Naimie uaina botade. Ñaite. Cide.

²³ Naiēna ciodino rajicaillanona raitimaci:

—Ñibai bimiedi David micori jito. Cai illaimana naimie illena, naimie micori jitomo ocuridicai.

²⁴ Iēna damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate — raitimaci.

²⁵ Naimiēna naimaci enoillana Jesús uiñuanona, naimacimo llote:

—Daje isoi comeciaina lloillamo daje nairai fa-cañenia, danomo maijinidimaci. Oni jaidimaci. Daje isoi comeciaina lloillamo daje jofomo itino fa-cañenia, danomo jainaiainidimaci. Oni jaidimaci.

²⁶ Ie isoide. Beelzebú uaido jananiaina omoi llua isoi cue oretaiā, Janaba ie dibeimo itino diga jai nabairiñede. Iēmona naimie comini danomo iñeitimaci.

²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iēmei cue finoca rafuena uaitañeitomoi.

²⁸⁻²⁹ Ero, mairidimie ie jofomo ite rana nibai fiacadomoi. Iēna fillena, naimiēna nano raise omoi maiga. Raise maia mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iēna finoredicue. Jusiñamui Joreño uaido

naimiena anafetitacue. Iemona Jusiñamui rafuena cue lluana jai uiñotomoi.

³⁰ Cue dibeimo iñedimie cuena enoide. Cue dibeimo cominina itatañedimiedi naie cominina cuena iñotañede.

³¹ Ie jira omoimo lloiticue: Jusiñamuidi nana comini jeacinona dotarede. Naimiedi comini maraiñedinona dotarede; iadedi naimiedi ie Joreñaona jeare ñaiacinona dotañeite.

³² “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamuimona biticue. Cuena omoi jeare ñaia, Jusiñamui iena faitarede; iadedi naimie Joreñaona omoi jeare ñaia, Jusiñamui iena birui feitañeite. Iena ico jaca feitañeite.

*Jesúdi riará llisilla llua rafue
(Lc 6.43-45)*

³³ Jesús llote:

—Llisillamona nie isoide riará illana uiñoticaí. Amena ie llisilla llillamona, amena marena uiñoga. Llillamona, amena maraiñenana jiaí uiñoga.

³⁴ Ie isoide. Omoi ñaiamona omoína uiñoticaí. Cuena omoi maraiñeno ñaia jira, omoi comeciaí iticinona uiñoticaí. Omoi maraiñena jira, jaío nairaídomoi isoidomoi.

³⁵ Mareuidimie mare ie comecimona ñaite; iadedi maraiñedimie maraiñede ie comecimona ñaite.

³⁶ Jamai ebena birui omoi ñaia, Jusiñamui uicomo nana comini ico illa facaiseconi Jusiñamui iba oite.

³⁷ Omoï jeare ñaiaconi duere sefuitomoi; iadedi omoï mare ñaiaconi duere sefuiñeitomoi. Ie jira Jusiñamui dibeimo omoï comeciaï iuai meido.

*Dajerie Jesús siño rafuena fïnuana jitailla rafue
(Mr 8.12; Lc 11.29-32)*

³⁸ Naie facaiseconi dajerie Moisés micorï llogacïnona llofuerainï dajerie fariseuai diga Jesúmo llotimaci:

—Maestro, o lloga uaina cai ñnollena, siño rafuena o fïnuana cioacadïcai.

³⁹ Jesús uai ote:

—Maraiñedicïnona fïnocabidomoi. Jusiñamui dibeimo iacaiñedomoi; iadedi siño rafuena cioacadomoi. Iena omoï jamai cioillena, siño rafuena fïnoñeiticue. Ero, Jonás micorï jaie ite rafuena uiñotomoi. Naiemo omoï comeciaina omoï faca.

⁴⁰ Darui amani aillue lliciaï jeraimo naimïe illamona jillode. Ie isoite. Cue fiodailla mei, darui amani raiafomo iitïcue. Iemei naiemona jilloitïcue.

⁴¹ Lliciaï jeraimona naimïe jillua mei, Nínive railla nairaï ñine Jonás micorï jaide. Nainomo Jusiñamui rafuena llote. Naie cominï iena cacajano, naimaci comeciaï icïnuaina meidotimaci. Cue rafuena omoï cacajamona, omoï comeciaï icïnuaina birui omoï meidoñena jira, Jusiñamui uicomo ñco nana cominï illa facaiseconi: “Cue cominïdomoi” omoïna raiñeitïcue. Jonás micorï baifemo birui uaidïcue; iadedi cuena ñnoñedomoi.

⁴² Ero, Saba railla nairaï ie illaiño micorïdi Salomón micorï ñine jaie aarena jaide. Naimïe micorï uiñuacïnona naiñaiño micorï cacareillena,

aarena jaide. Salomón micorí baifemo birui uaidicue; iadedi cuena ñnoñedomoi. Omoi comeciaí icinuaina birui omoi meidoñena jira, Jusiñamui uicomo nana comini ille facaiseconi naiñaiño micorí omoína ico ñaite: “Naimiedi siño rafue finuana ciodomoi. ¿Bue ñellena naimiena ñnoñedomoi?” omoína ico ñaite.

Janaba anamo illamie rafue

(Lc 11.24-26)

⁴³ Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede.

⁴⁴ Baiñena jira, naimie comecina facade: “Navui cue anamo illamie dine abido jaiticue”. Abido naimie bia, naie ñima comeci namanidena naimie baite.

⁴⁵ Iemei oni jaillanona, jiaie siete jananiaina naimie diga atide, naimaci anamo naie ñima illena. Naie siete jananiai naimie baifemo maraiñedimaci. Iemona naie ñima eo fodo jaide. Ie isoide birui ite maraiñede comini. Cue rafue naimaci ñnoñenia, eo fodo jaitimaci.

Jesús ie comini

(Mr 3.31-35; Lc 8.19-21)

⁴⁶ Jofomo comini diga Jesús nia ñaia, naimie ei, ie amatiaí diga, bite. Naimie diga ñaiacanano, jino naidaide.

⁴⁷ Damie Jesúmo llote:

—O ei, o amatiaí diga, jino ite. O diga ñaiacade.

⁴⁸ Naimiemo Jesús ñinena jicanote:

—¿Bu cue ei? ¿Bu cue amatiaí?

49 Ie llofueoicaigano dine ie onolli ñuitajanona, raite:

—Jadi, cue ei, cue amatiái.

50 Cue Moo monamo ite. Naimie jitaillacinona finodimiedi cue amana, cue miriñona, cue eina. Imaci ua cue cominina.

13

Trigo judaidimie rafue

(Mr 4.1-9; Lc 8.4-8)

1 Nai jofomona nairui Jesús jaillanona, jorai fue dine jaide.

2 Ailluena comini nainomo ofilla jira, botemo Jesús jaillano, ana raide; iadedi comini jorai fueo itimaci.

3 Ailluena rafue naimacimo llote:

—Jusiñamui omoína sedaacana omoi fueollena, bie rafuena lloiticue. Damie trigona judaiaide.

4 Naimie judaiamona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede.

5 Nofiemo jiaie iduai juide. Nainomo enirue raise iñede. Sicode; iadedi enirue raise iñena jira,

6 raise jainañena jira, ecasillamona duide. Ie jira llisiñede.

7 Eecuai illanomo jiaie iduai juide. Eecuai sicuamona, riará eecuai ibaica. Ie jira llisiñede.

8 Mare eniruemo jiaie iduai juide. Sicode. Llisillamona danademo cien diga llisillana ote. Jiaínamona sesenta diga llisillana ote. Jiaínamona treinta diga llisillana ote.

9 Omoi jeforena jira, raise fueollena, cue lluamo cacarei. Iena ñno.

*Jesús ie como lloga rafuena llofuia rafue
(Mr 4.10-12; Lc 8.9-10)*

¹⁰ Ie llofueoicaigano Jesús mo jicanuaibiside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamuidi omoina ie sedaacana rafuena jai uiñoñotade. Jaie iena uiñoñedomoi. Jiaie cominina iena nia uiñoñañede.

¹² Jusiñamuina ñnotimie Jusiñamui rafuena ñnocana jaite. Jusiñamui naimiena uiñoñotaite; iadedi Jusiñamuina ñnoñedimie Jusiñamui rafuena uiñoñecana jaite.

¹³ Ie jira bie isoidicinodo naimacimo lloticue. Cue siño finoca rafuena cioidimaci; iadedi iena naimaci ñnoñena jira, uiñoñeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci.

¹⁴ Isaías micori naimacina jaie cuega rafue birui jai suide. Jaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioidomoi; iadedi iena uiñoñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacacaiñedomoi.

Jai uisnidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoina cue jilloitai raillanona”.

Isaías micori Jusiñamuina ñnoñedinona iese jaie cuete;

¹⁶ iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi inua jira, ni ua omoi marena ille jillaci.

¹⁷ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie inotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesúdi trigo judaidimiena llua rafue

(Mr 4.13-20; Lc 8.11-15)

¹⁸ Jesús llote:

—Ero, omoina trigo iduaina judaidimie rafuena llofueiticue.

¹⁹ Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaino cacaja uaina inotañede.

²⁰ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacai, iena caimare feiñotimaci.

²¹ Nofiemo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefui, abido danomo uaidimaci.

²² Jiaie iduai eecuai illanomo juide. Naie iduai sicua mei, iena eecuai ibaila jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Inotimaci; iadedi naimaci comeciai jarire illamona, naimaci raruiaina ebiruillamona, naie uai naimaci

comeciaimo itabiñede. Jusiñamui jitailla rafuena finocana jaiñedimaci.

²³ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaide.

²⁵ Naimie inia mei, ie enoidimie trigona eruaide raiticiaina bainino judaiaide. Iemei oni jaide.

²⁶ Trigo sicuamona lliside. Naie facaise naie raiticiai como raise bairede.

²⁷ Judaidimie maijiraini iena ciuanona, naimiemo llote: “Mare iduai navui ritio. ¿Niesedeta raiticiai eo sicode?”

²⁸ Uai ote: “Cuen a enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana jitaideo?”

²⁹ Uai ote: “Dama ite. Raiticiai omoi raitia, trigona jai jaitaitomoi. Dama iesede.

³⁰ Danomo sicoite. Ua facaiseconi cue maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

*Jesúdi mostaza ido llua rafue
(Mr 4.30-34; Lc 13.18-19)*

³¹ Jesús jiaie rafue llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riará sícode.

³² Mostaza ido eo janorede; iadedi sícua mei, eo aillue riará jaillamona, nainomo silliñiaí jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina íco jaitimaci.

*Jesús siritate rana llofuia rafue
(Mr 4.33-34; Lc 13.20-21)*

³³ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede.

³⁵ Jusiñamui facaina lloraima micori iena jaie cuega:

Jusiñamui llote: “Jiaie isoide rafuedo cominimo lloiticue.

Comini nia uiñoñega rafuena lloiticue. Enirue finua facaisemona jaca bu iena uiñoñede.

Birui naimaci uiñoñena, iena lloiticue”.

Jesús trigo motomo riga raiticiaina llofuia rafue

³⁶ Comini jino fainonocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uiñollena, trigo motomo riga raiticiai rafuena caimo llono.

³⁷ Uai ote:

—Mare iduai judaidimiedi cue. Jusiñamui rafuena lloticue.

³⁸ Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini.

³⁹ Naie maraiñede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisai. Trigodi cuena ñnotino.

⁴⁰ Jobaillena raiticiai ofitaja isoi, ico abido cue bia, daje isoi iite.

⁴¹ Cue jaienisaina oretaiticue, nana jeacinona finoraini diese ofitallena, cue illanomona iraimo dotallena.

⁴² Nainomo eo duere sefuillamona, eeditimaci. Subicaitimaci.

⁴³ Iemei jitoma lligaiñua isoi, Jusiñamui sedajanomo naimiena ñnotinodi marena bairenitimaci. Omoi jeforena jira, raise fueollena, cue lluomo cacarei. Bie isoi omoi duere sefuñellena, cue lluana ñno.

Jesúdi eniruemo isiruiga reica rana llofuia rafue

⁴⁴ Jesús llote:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai iñena jira, naie eniruena uainino íbaacade, naie ra ollena. Ucube ollena, naie rari iobilla jira, nana naimiemo ite raruiaina fecaite. Iemei eniruena

ibajte. Ie isoide. Jusiñamui illanomo omoï illena, jiaie rafue uanona jaiñeno. Dani Jusiñamui rafuena uanona jai. Dani iemo omoï comeciaina faca.

Perlas railla rafue

⁴⁵ Jesús llote:

—Jusiñamui dibeimo comini jailla rafuena lloiticue. Iena omoï raise uiñollena, perlas railla rana ibaraimana lloiticue. Eo mare perlas iballena jenocabide.

⁴⁶ Eo raifide perla naimie baia, naie perlana iballena, nana ie raruiaina fecaite. Ie isoide. Jusiñamui ie cominina sedaacaja rafuena omoï cacaja jira, iena ocana jai.

Jesús lloijina ñaia rafue

⁴⁷ Jesús llote:

—Jusiñamui dibeimo comini jailla rafuena lloiticue. Iena omoï raise uiñollena, lloijina lloiticue. Joraimo lloijina comini faianona, naga isoide lliciaina otimaci.

⁴⁸ Ari sonua mei, mare lliciai diese fetodimaci. Marañede lliciai diese oni faitimaci.

⁴⁹ Ie isoide. Ico abido cue bia, iese iite. Jusiñamuina ñnotinomona naimiena ñnoñedino diese oni fetollena, Jusiñamui jaienisaï biitimaci.

⁵⁰ Iemei iraimo Jusiñamuina ñnoñedinona dotaitimaci. Nainomo eo duere sefuillamona eeditimaci. Subicaitimaci.

Jesús llofueoicaiganodi mare rafuena jai uiñua rafue

⁵¹ Ie llofueoicaiganomo Jesús jicanote:

—¿Nana cue lluaana cacadomoï?

Uai otimaci:

—Jii, nana cacadicaí.

⁵² Naimacimo llote:

—Ie jofomo comini bia, naimacina raise nafuel-lena, naimacina caimare itatallena, jofu nama ie mare raruaímona naimaci jitailla ra naimacimo fecade. Comini comeciaina lloticue. Jusiñamui facaina lloraíni micoriaí llogacinona uiñotomoi. Cuetmona Jusiñamui ie cominina sedaja rafuena fueocana jiaí jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide.

⁵⁴ Ie eniruemo rillanona, Nazaretmo ite ofira-como llofujete. Naiemona cominidi rajicaillamona raitimaci:

—¿Ñiese naimiedi eo abina uiñote? ¿Ñiese siño rafuena naimiedi finode? Naimiedi jamai bue isoidimie.

⁵⁵ Naimie amederaima jito. Naimie eidi María. Naimie amatiáidi Jacobo, José, Simón, Judas.

⁵⁶ Naimie miriñotiaídi caí motomo jiaí ite. Naimaci diga nagarui nabairiticaí. Naimieori caí nabairicabilla. Ie jira, ¿ninena ie siño uaina ote?

⁵⁷ “Caí comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraíma uaina feiñotimaci; iadedi naimie nairaímo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite.

Ie isoide. Cue cominidomoina jira, cue uaina ñnoñedomoi.

⁵⁸ Naimie uaina naimaci ñnoñena jira, Jesús ail-luena siño rafue finoñede.

14

*Juan Bautista micori fiodailla rafue
(Mr 6.14-29; Lc 9.7-9)*

¹ Naie facaiseconi Herodes railla gobernador Jesús mamecina cacade.

² Naimie ecimo maijuidinomo llote:

—Fiodaillamona Juan Bautista micori jai jillode. Jesús raillamedí naimie. Ie jira naimiedí siño rafuena finocabide.

³⁻⁴ Iese raite, Herodes Juan micorina navui meinetaja jira. Juan Bautista micorina nia meinetañenia, Herodedí ie ama Felipe aina ote. Naiñaiño mamecidí Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluana gaiñenano, naimiena duere finode. Herodes Juan micorina gaitatajanona, cárcelmo jonetade.

⁵ Naimie micorina meinetaacade; iadedí Herodes dinena cominina jaciruite. Juan micoridí Jusiñamui facaina lloraimana naimaci raillanona, naimie micorina jaciruite.

⁶ Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade.

⁷ Ie jira naiñaiño llote:

—Níe isoide rana o jitaiadedi, omo iiticue. Illaíma uai cuemo illa jira, iena ua finoiticue.

⁸ Naiñaiño ei naiñaiño mo lluanona, naiñaiño uai ote:

—Juan Bautista ifogí bandejamo jonecaida, cuemo ine.

⁹ Iena cacajano, naimie sunaite; iadedi naimie jino ie llua uaina jira, nainomo naimie uaidogano jiaí jai cacaja jira, Juan micorína meinetajana llote.

¹⁰ Ie lloga uaina finollena, cárcelmo soldadona orede. Nainomo Juan micorí ifogína jaitade.

¹¹ Bandejamo naimie micorí ifogí jonecaida, soldado atiano, Herodías jisamo fecade. Ieconi ie eimo fecade.

¹² Iena fidianona, Juan micorí llofueoicaigano naimie micorí abina uaibitimaci. Iena naimaci raia mei, Jesús mo lluaidimaci.

*Jesús cinco mil iñiaína ecaja rafue
(Mr 6.30-44; Lc 9.10-17; Jn 6.1-14)*

¹³ Juan micorí meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaímona eillido bitimaci.

¹⁴ Eniruemo Jesús sijia, ailluena cominina dafaífide. Naimacina ciuanona, naimacina duenaillanona, duidinona jillotate.

¹⁵ Jitoma ana itemo, ie llofueoicaigano naimie dine lluaíbitimaci. Raitimaci:

—Jofue bene iñede. Jaca buedi iñede. Jai navuacade. Cominina mai abido oreta. Ianori ite nairaimo naimaci guille ollena, naimacina oreta.

¹⁶ Uai ote:

—Naimacina oretañeiticue. Naimacina omoieca.

¹⁷ Uai onaisite:

—Dani caimo ite cinco llomenico, mena lliciaidiga.

¹⁸ Uai ote:

—Iena cuemo ati.

¹⁹ Raitie illanomo comini ana raillesa llono —raite.

Naie cinco llomeniconana naie mena lliciaidiga uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena.

²⁰ Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

²¹ Cinco mil iñiaidiese guitimaci. Naimaci aitiaijiaidigitimaci. Naimaci uruiaijiaidigitimaci.

Jesús jinui emododo macarilla rafue

(Mr 6.45-52; Jn 6.16-21)

²² Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote.

²³ Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite.

²⁴ Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci.

²⁵ Nia monañedemo, jinui emododo naimaci dine Jesús bite.

²⁶ Naimiena naimaci ciuanona, jacinaillamona, raitimaci:

—¿Bu joreño caimo billana ciodicai? —
Jacinaillamona cuiriidimaci.

²⁷ Naie dacaiño Jesús naimacimo llote:

—Omoi joreñonicaiño. Cuesa. Jaciruiño.

²⁸ Pedro uai ote:

—Uanai cai Namadio. O dine cue billesa cuemo llono.

²⁹ Jesús uai ote:

—Cue dine bi. —Ie jira botemona jinui emodo Jesús dine Pedro macarite;

³⁰ iadedi aifi billana naimie cianona, jacinaite. Jinuimo anabaiacade. Ado cuirioide:

—Nama, cuena cano.

³¹ Jesús ie onolli oni ñuitajanona, naimiena llinuanona, raite:

—Eo janore cue uaina inotio. ¿Bue ñellena eo inoñedio? Cuena inotiodena, jinui emododo cue dine niadedi ridio.

³² Botemo a iaiaiai jaillamona, ie facaise aifi lliscaide.

³³ Ie jira botemo itino Jesúmo iobillacinona fecadimaci.

—Odi ua Jusiñamui Jitodio —raitimaci.

Jesúdi duidinona Genesaret eniruemo jillotaja rafue

(Mr 6.53-56)

³⁴ Ruica dine jaillanona, Genesaret railla eniruemo ridimaci.

³⁵ Jesúna nainomo itino uiñuamona, naimie dine duidinona atillena, nana nairaimo jiaie cominina oredimaci.

³⁶ Naimie dine billanona, dani ie iniroi fuedamo jutadallena naimiemo jicanotimaci. “Naimie iniroimo cai jutadallemona jilloiticaí” raillamo

comeciaina facadimaci. Nana jutadate diese jillodimaci.

15

*Jesúdi comini comeciaina ñaia rafue
(Mr 7.1-23)*

¹ Jerusalémona fariseuai comini Jesús dine bitimaci. Moisés micori llogacinona llofueraini jiai bitimaci.

² Naimiemo jicantimaci:

—¿Bue ñellena o llofueoicaigano cai einamací rafuedo jaiñedimaci? Nimaci guiacania, nimaci onolli cai einamací llua isoi raise jocoñedimaci. Ie jira cai abimo jeacino finodomoí.

³ Jesús uai ote:

—¿Bue ñellena nana Jusiñamui llogacinodo jaiñedomoí? Omoí einamací llogacinodo jaidomoí; iadedi nana Jusiñamui llogacinodo raise jaiñedomoí.

⁴ Jusiñamui jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie eiri jeare ñaitimie meinelle”.

⁵ Iese Jusiñamui llote; iadedi omoí einamací llotimaci: “Jusiñamuimo cai ucubena cai fecajamona, cai moona, cai eina jai canonidicai”.

⁶ Iese omoí finocabilla jira, omoí einamací llogacinodo omoí jaillamona, Jusiñamui uaina jaimaidomoí.

⁷ Mareuidinona abi caitauidinodomoí. Isaías micori omoína jaie raise llote. Naimiedi Jusiñamui llua cuete:

⁸ Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticai” llotimaci. “Ona sedadica” llotimaci.

Jamai ñaitimaci. Naimaci comeciai cue dibeimo raise iñede.

⁹ Cue uai itena, jamai comini lluaicinona naimaci llofuecabilla jira, tainona cuena sedadimaci.

¹⁰ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue llua mo cacarei.

¹¹ Omoi einamac i soi omoi guiñenia, naimaci soi omoi onollina omoi jocoñenia, omoi comeciaina jearetañedomoi. Omoi guigamona, omoi onollina jocuamona, Jusiñamuina nabaiñedomoi. Omoi mo jeacino illa jira, Jusiñamuina nabaiñedomoi. Omoi comeciai jearena jira, jeacinona finocabidomoi.

¹² Ie llofueoicaigano naimiemo lluaibitimaci:

—O llua muidona, fairseuai cominina icidio.

¹³ Naimie dinena uai ote:

—Dama ite. Nana cue Moomona oñega rafuedi jai ieconi duite. Naimaci rafue cue Moomona oñenia, ja muidomo ieconi duite.

¹⁴ Uanaicina faionocai. Uanaicinona naimaci uiñoñena jira, uisnidino isoidimaci. Jiamiena uisnidimie ifoia, dafomo uaidiaimaia. Ie isoide. Uanaicinona fariseuai uiñoñena jira, uanaicinona llofuenidimaci. Uanaicinodo jaiñedimaci. Ja muidomo faifitimaci.

¹⁵ Pedro naimiemo llote:

—Aillinano o llua caimo raise llono.

¹⁶ Uai ote:

—¿Ñiese cue llua nia jiai nia cacaiñedomoi?

17 Nie isoide ra guitomoina, omoï jebemo jaide. Ie mei omoï abiaïmona jino bite;

18 iadedi omoï comeciaino iticinomona jeare-dena ñaitomoi. Omoï comeciái jearena jira, jearede rafuena finocabidomoi.

19 Omoï comeciái jearena jira, jeare comeciaina facacabidomoi. Comena meinecabitomoi. Omoï aiñede riño diga icabitomoi. Omoï iniñede iima diga icabitomoi. Firicabitomoi. Tainona llogiricabitomoi. Jiaie comini joreña jeare ñaicabitomoi.

20 Bie isoidicinuai omoï comeciaino illa jira, jearede rafuena finocabidomoi; iadedi omoï einamací llua isoi, omoï onolli jocoñenamona jeacino comuiñede.

*Jesúdi judío iñaiñoñediñaiñoña jillotaja rafue
(Mr 7.24-30)*

21 Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiaí jaide.

22 Ie facaiseconi naie eniruemona judiúñediñaiñoñodi billanona, raite:

—Maestro, David micori jitodio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

23 Jesús uai oñede. Ie jira ie llofueoicaigano naimie ñine billanona, duere llote:

—Naiñaiñoña abido ie jofomo oreta. Caimo duere jicanuaibitesa.

24 Jesús uai ote:

—Faificana jaillana naimaci jai jailla jira, dani cai judiúai cominimo cue Moo cuena oretate. Naimiedi judiúñediñaiñoño cuena oretañede.

²⁵ Ie facaise naimie dine naiñaiño billanona, naimiemo iobillacinona fecallena, caiñici ifodo ana rainada raite:

—Maestro, cuena cano.

²⁶ Judíuaiñedinona naimie canoñenana naiñaiño uiñollena, naiñaiño mo Jesús llote:

—Uruiai guillamona jiconiaina ecadicaidena, maraiñede.

²⁷ Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona gutimaci. —Iese llote; ia jiaie rafuemo comequina facade. Uruiaina llote; iadedi judíuaimo comequina facade. Jiconiaina llote; ia judíuaiñedinomo jiai comequina facade. Comequina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁸ Jesús uai ote:

—Cue uaina o inua jira, o jitailla rafuena finoiticue. —Ieconí naiñaiño jisa jillode. Janaba naiñaiño mona oni jaide.

Jesús ailluena duidinona jillotaja rafue

²⁹ Nainomona Jesús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei,

³⁰ ailluena comini naimie dine bitimaci. Ailluena duidinona atidimaci. Njuja-ñujacaida macaritinona, onollina idisaruaidinona, uisinidinona, uainidinona atidimaci. Diga duidinona naimie dine atidimaci. Iemei naimacina jillotate.

³¹ Ailli uainidino jai ñaiana cacajamona, ailli onollina idisaruaidino onolli jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisidino jai ciuana ciuamona, nainomo ite comini eo rajicaidimaci. Cai Jusiñamuimo iobillacinona fecadimaci.

*Jesúdi cuatro mil iñiaina ecaja rafue
(Mr 8.1-10)*

³² Jesús ie llofueoicaigano naimie dine uaidu-
anona, raite:

—Bie comini darui amani bene cue diga illa jira, naimacimo guille jai iñede. Naimacina aimeri ore-taiacaiñedicue, naisomo naimaci bai raillanona. Naimacina cue duenalla jira, naimacina canoacadicue.

³³ Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

³⁴ Jesús jicanote:

—¿Niga llomenico omoimo ite?

Uai otimaci:

—Siete. Janorede llicisiriaí caimo jiaí ite.

³⁵ Comini ana raillena Jesús llote.

³⁶ Naie llomenico llicisiriaí diga uanona, Jusiñamuimo iobillacino fecade. Tailluanona, ie llofueoicaiganomo fecade, naie cominimo fecallena.

³⁷ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci.

³⁸ Nainomo cuatro mil iñiaí guitimaci. Naimaci ainiaí jiaí guitimaci. Naimaci uruiaí jiaí guitimaci.

39 Iemei cominina naimaci jofuemo orede. Naimacina oretaja mei, botedo Magdala railla eniruemo Jesús jaide.

16

Fariseuai comini Jesúsno siño rafuena finuana jicanuano billa rafue

(Mr 8.11-13; Lc 12.54-56)

¹ Dajerie fariseuai comini Jesús dine bitimaci. Naimiena facacillena, dajerie saduceuai comini jiai bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

² Jesús uai ote:

—Jitoma sojicaidemo, mona jiairenia, raitomoi: “Ico are maremonanite”.

³ Jiai raitomoi: “Jitiramo mona jiairenia, ja noci deite”. Monamo omoi eruaillamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi.

⁴ Jeacinona finocabidomoi. Jusiñamui dibeimo raise iacaiñedomoi. Siño rafuena finoñeiticue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiai jilloiticue. —Ie llua mei, naimacimona Jesús ie llofueoicaigano diga oni jaide.

Jesús siritate rana llofuia rafue

(Mr 8.14-21)

⁵ Ruica dine naimaci rillanona, ie llofueoicaigano llomeniconona feillana uibiñotimaci.

⁶ Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

⁷ Jesús iese llua jira, iena naimaci raise cacaiñena jira, dan coniniri siadotimaci:

—Llomeniconona cai atiñena jira, caimo iese llote.

⁸ Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise ñnoñedomoi. Omoina canoredicue. ¿Bue ñellena dan omoi llomenico iñenana siadotomoi?

⁹ ¿Ñiese ñnoñedomoi? ¿Ñiese cue navui siño finoca rafuemo comeciaina facañedomoi? Navui cinco mil iñia: cinco diganicodemo guitimaci. Monillamona, guigamona fiebillamona, doce cirigaiaimo iraidomoi.

¹⁰ Jiaicaiño cuatro mil iñia: siete diganicodemona guitimaci. Monillamona guigamona fiebillamona, siete cirigaiaimo iraidomoi.

¹¹ Omoina cue ecallena, ¿ñiese cuena birui ñnoñedomoi? Llomeniconona ailli ñañedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

¹² Ie facaise naimie llua jai cacadimaci. Llomenico siritate rana naimie ñañede; iadedi fariseui llofuiacinomona naimaci abina

rairuillena ñaite. Saduceuai llofuiacinomona naimaci abina rairuillena ñaite.

*Pedro Jesúsna lua rafue
(Mr 8.27-30; Lc 9.18-21)*

¹³ Cesarea Filipo railla eniruemo Jesús jaidemo, ie llofueoicaiganomo jicanote:

—¿Ñiese jiaie comini cuena raitimaci?

¹⁴ Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraima micoridio”.

¹⁵ Jesús dane jicanote:

—¿Ñiese omoi cuena raitomoi?

¹⁶ Pedro uai ote:

—Odi cai jilloitaramadio. Cristodio. Jusiñamui facaina lloraini micoriai o billena jaie llotimaci. Cai cajede Jusiñamui Jitodio.

¹⁷ Jesús dinena uai ote:

—Simón Pedro, Jonás jitodio. Marena llotio. Comini ona iena uiñotañede; iadedi cue Moo Jusiñamui ona iena uiñotade.

¹⁸ Pedro, o comecina uiñoticue. Cuena como o lloga uaina meidoñeitio. Bie rafuena jiaie cominimo o llumona, jiai inoitimaci. Cuena ñnuamona, cue cominina jaitimaci. Cue dibeimo iñedino iena itatanidimaci.

¹⁹ Ailluena cominimo Jusiñamui ie cominina jailla rafuena nano lloraimana jaitio. O llucinodo jaitino cue cominina jaitimaci. O llucinodo jaiñeitino cue cominina jaiñeitimaci

²⁰ Iena lua mei, ie llofueoicaiganona rairuide:

—Cue Cristonana bumonia lloñoeno.

*Jesús ie fiodaillena llofuia rafue
(Mr 8.31-9.1; Lc 9.22-27)*

²¹ Naie facaise mona ie llofueoicaiganomo Jerusalémo naimie jaillena marefodo llote:

—Nainomo cai judíuai illaicomini cuena eo duere finoitimaci. Cuena meineitimaci; iadedi darui amani illanona, fiodaillamona jilloiticue.

²² Pedro dinena lletade:

—Nama, ¡Jusiñamui iena jitaiñede! Bie isoide rafue omo suiñeite.

²³ Jesús jinafo dine naimiemo erodate. Raite:

—Cuemona oni jai. Iese ñaiñeno, Taife isoí o comecina o facaja jira. Jusiñamui isoí cuemo comecina facañedio. Comini isoí cuemo comecina facadio. Iese o comecina facañeno.

²⁴ Ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite.

²⁵ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jai, jaca faifiñeite.

²⁶ Cue cominina bu jaiñenia, nibai eo duere sefuiñeite. Nibai ailluena ra naimiemo iite; ia, ¿niése cue Moo dine riite? Nainomo naimie riñeno faifite.

²⁷ Cue jaienisai diga cue Moo dinena monamona ico biiticue. Cue Moo uai cuemo illanona, ebirena biiticue. Nagamie imaci finoca rafue diese cue iba ollena biiticue. Cue cominiñedinona duere finoiticue.

28 Unaicinona omoimo lloiticue. Omoimona dajerie nia fioidañeitomoimo, illaimana cue bairellena cioitomoí.

17

Jesús abi meidocailla rafue

(Mr 9.2-13; Lc 9.28-36)

¹ Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uiñede.

² Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie iniroi naie dacaiño eo userecaide.

³ Naie facaise naimacimo Moisés micori joreño, Elías diga bairede. Elíadi Jusiñamui facaina jaie lloraima. Jesús diga ñaitiaimaiaí.

⁴ Jesúmo Pedro llote:

—Nama, bene cai illana mare. O jitaia, daje amani bisaini finoiticue. Daje oue; jiaie Moisés micori ie; jiaie Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie llamo cacareillanona, iena ñno —llote.

⁶ Jesús llofueoicaigana iena cacajanona, eo jaciruillanona, naimaci uieco dinena ana bitadatimaci.

⁷ Jesús naimaci dine billano, naimacina jetajanona, raite:

—Mai jaciruiñeno naidacai.

⁸ Naimaci erorillamona, dama Jesúna ciodimaci.

9 Anedumona bitimacimo, naimacimo Jesús llote:

—Omoi ailli ciua rafuena bumo lloñoeno, cue fio-daillamona cue jillua dinori.

10 Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitaraima biite” raitimaci. Jusiñamui mona o billana inotica. Odi cai Jilloitaraimana inotica. Odi cai Jilloitaraimadomo, ¿bue ñelli iese raitimaci?

11 Uai ote:

—Raise inotomoi. Elías isoidimie jai bite, nana Jusiñamui jitailla rafue raise lollena. Jusiñamui dibeimo naimaci illena, comini imaci comeciai meiduana llote.

12 Ero, naimie jai bite; iadedi bie comini naimiena raise uiñoñedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, imana cue jaillena; iadedi duere sefuiticue.

13 Ie muidona Jesús llofueoicaigano naimiedi Juan Bautista micorina ñaiana jai uiñotimaci.

*Jesúdi Janaba anamo itimiena jillotaja rafue
(Mr 9.14-29; Lc 9.37-43)*

14 Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaidu-anona, caiñici ifodo rainadacaida raite:

15 —Maestro, cue jitona duenai. Janaba anamo naimie ite. Iemona naillicabide. Duere sefuide. Uai-uaicabide. Jiaicaiñodedi iraimo uaillanona, uside. Jinuimo jiai uaillanona, niadedi corobaite.

16 Naimiena jilloitallena o llofueoicaigano dine naimiena atidicue; iadedi naimiena jillotanidimaci.

17 Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi ñnollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

18 Naimiena atiamona, Jesús naimiemo Janaba illana uiñote. Janabana Jesús lletaja jira, naie uruemonna Janaba oni jaide. Ieconí naie urue jillode.

19 Ie mei ie llofueoicaigano Jesús mo anado jicanotimaci:

—¿Bue ñllena Janabana oni oretanidicai?

20 Uai ote:

—Raise nia omoi ñnoñena jira, uanaicinona omoi mo lloiticue. Janaba oni oretallena, cue uai navui omoi mo iticue. Birui raise cuena omoi ñnoñenia, bie Janaba oni oretanidomoi. Jusiñamuina eo janore ñnotomoidena, diga rana finodomoi. “Oni bai jai” bie anedumo llotomoidena, omoi na naimie canuamona, bie anedu oni liai bai jaite. Jusiñamuina omoi ñnoia, naga rana finoredomoi.

21 Jusiñamuimo omoi comeciaina facallena omoi guiñenamona, Jusiñamui diga omoi ñaiamona, bie isoide Janabana oni oretaredomoi.

*Jesús ie fiodaillena dane llofuia rafue
(Mr 9.30-32; Lc 9.43-45)*

²² Galileamo ie llofueoicaigano diga danomo itemo, Jesús naimacimo lloste:

—Monamona billanona, imana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci.

²³ Naie illaicomini cuena meineitimaci; iadedi darui amani illamona, cue Moo cuena jillotaite. — Iena cacajanona, ie llofueoicaiganodi sunaitimaci.

Jesúmo Jusiñamui jofofacaina damie ibatajarafue

²⁴ Capernaumo naimaci rilla mei, Jusiñamui jofoucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

²⁵ Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci jitoniamona ocabiñedimaci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitoniana ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofofacaina naimie cuena ibatañede;

²⁷ iadedi Jusiñamui jofoucube orainina coco icinllesa, ucubena jenuai. Joraimo aimajaitiosa jai. Nano o olle lliciai fuena jibui. Nainomo

ucubena baitio. Iena uanona, Jusiñamui jofomo coco facaina feca. —Pedro iena finode.

18

*Jesús ie llofueoicaigano moto imiēna ille rafue
(Mr 9.33-37; Lc 9.46-48)*

¹ Naie facaiseconi naimie dīne ie llofueoicaigano jīcanuaībitimaci:

—Jusiñamui ie comīnina sedajanomo īco cai ia, ¿bu cai moto imiēna ille?

² Iena cacajanona, Jesús daje urue uaiduanona, naimaci motomo jonete.

³ Uai ote:

—Uanaicīnona omoīmo lloiticue. Jusiñamui dībeimo omoī illena, jeacinona omoī fainonocaiñenia, bie urue isoi omoī moto imiēñedimīēna illanona, Jusiñamui sedajanomo iñeitomoī. Cue comīnina omoī ia, bie urue isoi iitomoī.

⁴ Bie urue isoi abi iedoñedimīedi Jusiñamui ie comīnina sedajanomo imiē moto naimiēna ille.

⁵ Bie isoidimīe cuemo duillamona, naimiēna feiñotimīedi cuena jai feiñote;

⁶ iadedi cuena iñotimīēna jeacinona finotaiacadimīe iēna finoñellena, jeacinona finotaiacadimīe cimāiomo aillue nofici maianona joraimo corobaillena, naimiēna dotacadena, cuemona mare.

*Jesúdi jeacinona finoñenana llofuia rafue
(Mr 9.42-48; Lc 17.1-2)*

⁷ Jesús llote:

—Ramo faitino duere sefuilesa. Diga ramo omoī faicana uitinomo riitomoī; iadedi Jusiñamui omoī ramo faitimīēna duere finoite.

8-9 Biena ñaiticue. Nie isoide rafue omoïna jeacino finotaia, iena linoñoeno. Naie rafue ñine jaiñoeno. Iemo eruaiñoeno. Rana omoï jetaja jira, omoï ciua rana jira, omoï jitaillamona jeacino finodomoï. Omoï abina omoï namatañeniadedi, omoï onolli jaita. Omoï uisina juicono. Iemona jeacinona finoñellena, Jusiñamui ñine daje onolli ñiga, daje eilli ñiga, daje uisi ñiga riitomoï; ia jeacinona omoï finoia, iraimo jaitomoï. Omoï comecina ñaiticue. Omoï abina omoï raise namatallena, omoï comeci nano raise fino. Jeacino omoï finoia, iraimo jaitomoï. Nana omoï abi ñiga iraimo jaitomoï. Iramo omoï jaiñellena, jeacino finoñoeno.

*Jesúdi naimiena #notinomona damie faifillana
jitañoena rafue
(Lc 15.3-7)*

¹⁰ Jesús llote:

—Urue isoi omoï illena como lloticue. Iena dane lloticue. Cue Moo naimacina uñua jira, bie urue isoidinona jamaiñocaiñoeno. Monamo cue Moo ecimo naimaci jaienisai jaca ite, naimacina canollena.

¹¹ Jusiñamuimona cue billanona, naimiena #noñedinona naimaci jeacinomona jilloitallena biticue.

¹² Ero, omoïmo iena jiaie rafuedo lloticue. Damiemo cien ñiga toica llaua ite. Naiemona daje feiraite. Iena faifiñellena, jiaie llauaiaina faionocaida, iena jenuaite.

¹³ Iena baillanona, ieri iobite. Baillari oni jaiñedinori baifemo iobite.

14 Ie isoide. Jusiñamui naimiēna ñnotinomona damiē faifillana jitaiñede. Ie jira naimacina jeacinona finotañeno.

*Jesús omoi ecimo itimie omoina jeare fñuana llofuia rafue
(Lc 17.3)*

15 Jesús nia llote:

—O ecimo itimie ona jeare finoia, naimie ñine iena lluai. Daiñamaia iena omico llono. O uai naimie fairioia, naimie o ñibeimo jai iite.

16 O uai naimie fairioñenia, jiañ menamiēna uiño, o lluomo iañamaiañ cacareillesa.

17 O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina ññioñedimiēna omoi nabaiñena isoi, Moisés llogacinodo raise jaiñedino omoi nabaiñena isoi, naimiēna nabaiñeno. Omoi ofiracomo naimiēna feiñoñeno.

18 Iese omoi finoia, omoi comeciñ daje isoi lloillamona, Jusiñamuimona mare.

19 'Omoimo nia lloiticue. Daje isoi comecina cue Moo Jusiñamuimo jicallena menamaiañ facajamona, cue Moomo iañamaiañ jianona, cue Moo iañamaiañ jitaille rafuena finoite.

20 Menamiē cue ñibeimo illamona, damiē amani cue ñibeimo illamona, naimaci motomo iticue.

21 Pedro naimiemo jicanuañbite:

—Nama, cue ecimo itimie cuena jeare finoia, ¿ñiga icaiño ñbana cue oñeno iena feitañiticue? Nibañ siete ñigacaiño.

22 Jesús ñinena uai ote:

—“Ñibai siete digacaiño” raitio. Ona jeare finodimie ie finoca rafuena naga icaiño feita. Iena omoi raise uiñollena, bie rafuena lloiticue.

²³⁻²⁴ Jusiñamui ie dibeimo itinona iese sedaite: Daje nairai illaimadi ie maijirainina uaidote, naimaci cuentas iballena. Damie eo debede. Diez mil ucubena debede.

²⁵ Naimie ucube iñena jira, naie illaimadi ie cuenta iballena, naimie ai, ie uruiyai diga, nana ie raruiyai diga, fecallena llote.

²⁶ Iena cacajano, ie illaima uicomo caiñici ifodo raita duere jicade: “Nama, dama ite. Fecuisse omo ibaiticue”.

²⁷ Naimie duenailamona, naie illaima llote: “Ibatañeiticue. Cuemo jai debeñedio. Mai jai”.

²⁸ Ie mei naimie jaide. Bai jaillanona, jiaie maijiraime diga dafaifide. Jai debeñedimie mo janore debede. Cien ucubena debede. Jai debeñedimie dinena ie cimaiona llinuana llote: “O debia cuemo mai iba”.

²⁹ Ie jira debedimie caiñici ifodo ana rainadacaida, duere jicade: “Ucube cuemo iñede; iadedi cuena duenai. Fecuisse omo ibaiticue”.

³⁰ Uai ote: “Ja raire jitaidicue”. Naimiena duenaiñena jira, cárcelmo naimiena jonetade, ie cuenta iballe dinori.

³¹ Naimie nabaiñiai iena fidianona, sunaitimaci. Ie jira naimaci illaima dine nana naie rafuena lluidimaci.

³² Naie illaimadi nano debedimiena abido uaiduano, naimie mo llote: “Maraiñedio. Navui o cuenta ibatañedicue, cuemo o duere jicanua jira.

³³ ¿Bue ñe o nabaina duenaiñedio, ona cue duenaila isoi?”

³⁴ Icirillamona, naie illaïma naimïena cárcelmo jonetade, nainomo duere sefuillena, nana ie cuenta ìballe ðinori.

³⁵ Ie isoide. Cue Moo Jusiñamui omoïna duere finoite, omoï comeciai jitaillamona omoï ecimo itimie ie marañede finoca rafuena omoï feitañenia —lote.

19

*Jesús ìima ie aina dotaja rafuena llofuia rafue
(Mr 10.1-12; Lc 16.18)*

¹ Ie llofueoicaigano ðiga Galileamona jaillanona, Jordán railla ille ruica ðibeïmo Judeamo Jesús jaide.

² Ailluena comini naimïena racaðimaci Nainomo duidinona jillotate.

³ Naimïena facacillena, dajerie fariseuai naimie ðine bitimaci. Rafuena jicanoiacadimaci. Naimaci uai naimie raise oñenia, naimïena duere finoacadimaci. Jicanotimaci:

—¿Ìima ie aina dotajana rairuidio? ¿Nïe isoide rafue muidona ðamie ie aina dotarede?

⁴ Jesús ðinena uai ote:

—Moisés micori jaie cuete: “Enirue finua facaiseconi Jesiñamuidi come iaïmaïaina finode. Ìimana finode. Riñona jiaï finode”.

⁵ Ie jira Jusiñamuidi jaie llote: “Ie ai ðiga illena, ìima ie moonna faïnonocaite. Ie eina jiaï faïnonocaite. Ie ai ðiga illamona, menade comedi ðaamïena jai jaide” llote.

⁶ Menade come jai ðamïena jai ite. Jusiñamui iese iaïmaïaina itataja jira, ìima ie aina dotañellesa. Riño ie inina dotañellesa.

⁷ Dane jicanotimaci:

—¿Bue ñe Moisés mīcori cuete: “ñima ie aina dotaacania, dotalle rabena nano cueite. Ie mei naiñaiñona dotaite”?

⁸ Jesús uai ote:

—Jusiñamui uaina raise omoi ñnoñena jira, Moisés mīcori ñima ie aina dotajana rairuiñede; iadedi nano dofoconi iese iñede.

⁹ Jiaie riño diga naimie illena, ie aina bu dotaia, jiaie ñima diga naiñaiño iñenia, naimiedi jeacinona jai finode. Ie aina dotajana rairuidicue.

¹⁰ Naimiemo ie llofueoicaigano ñinena llotimaci:

—Iese ia, cai jitaillamona aina jamai cai dotanina jira, damamei ainidicai.

¹¹ Naimacimo Jesús lloti:

—Nana comini omoi como llucinodo jainidimaci. Dani Jusiñamuina jitaidino iedo jairedimaci.

¹² Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

*Jesúdi naimie ñine uruiai billana jitailla rafue
(Mr 10.13-16; Lc 18.15-17)*

¹³ Jesús ñine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo lloñena jitaidimaci. Ie llofueoicaigano iena rairuidimaci;

¹⁴ iadedi Jesús raite:

—Uruiai cue ñine billesa. Naimacina rairuiñeno. Cuenas bie isoide ñnotinodi Jusiñamui ie cominina sedajanomo jainaiñedimaci.

15 Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

*Ucuberedimie Jesús diga ñaia rafue
(Mr 10.17-31; Lc 18.18-30)*

16 Jesús oni jaillanona, conirue Jesús dine bite. Jicanote:

—Maestro, Jusiñamui diga cue jaca illena, ¿nie isoide mare rafuena finoiticue?

17 Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina inocana jai.

18 Uai ote:

—¿Nie llogacinuaina inoiticue?

Jesús dinena uai ote:

—Comena meineño. O aiñede riño diga iño. Fiiño. Jiamiena o llogidoia, tainona lloño.

19 O moo uaina ino. O ei uaina ino. O abina o isiruilla isoi, nana cominina isirui.

20 Naie conirue uai ote:

—Nana iena jai inoiticue. ¿Nie isoide rafuena nia finoiticue?

21 Jesús dinena uai ote:

—Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuen a o inuamona, monamo ico jaca iitio. Cue llofuegamiena o illena, mai cue diga bi.

22 Iena naimie cacajano, sunaite. Naimiemo eo alluena ra illa jira, iena feacaaiñede.

23 Jesús ie llofueoicaiganomo llote:

—Uanaicinona omoimo lloiticue. Ucu-beredimiedi Jusiñamui cominina jaillena eo sefuiruite.

²⁴ Iena nia lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiaí raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaídi Jusiñamui cominina jaiticaí?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

²⁶ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana faínonocaida, o diga jaicabidicaí. ¿Niese Jusiñamuimona ibana feiñoiticaí?

²⁸ Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiaí iite, nainomona omoi judíuai doce nairaiaína omoi sedallena.

²⁹ Cuená naimie isiruillamona, ie jofona bu faínonocaia, ie amatiaina bu faínonocaia, ie miriñuaina bu faínonocaia, ie mooná bu faínonocaia, ie eina bu faínonocaia, ie uruiaína bu faínonocaia, ie eniruena bu faínonocaia, Jusiñamuimona ailluena ibana feiñoite. Monamo ico caímare iocire jaca iite. Nainomo benomo baífemo iocire caímare iite.

³⁰ Jamai bue isoidomoi. Omoimona jiaino jamai bue isoiñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

20

Jesús Jusiñamui ie cominina sedaacana llua rafue

¹ Jesús llote:

—Jusiñamui dibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijuidinona jenuaide.

² Dajeriena baillanona, “Omoimo daberie ibaiticue” llote. “Jee” raitimaci. Ieconi ie illimo maijillena, naimacina orede.

³ Jitoma nia oni daidemo, mercadomo naimie jiaínona cide. Jamai itimaci.

⁴ Ie jira naimacimo llote: “Cue illimo maijiai. Raise ibaiticue” llote.

⁵ Ie mei jaidimaci. Jitoma naidai ia, jiaínona cüanona, naimacimo maijillena llote. Jitoma oni caidemo, jiaínona cüanona, naimacimo maijillena jiai llote.

⁶ Jitoma jasici muido itemo, jiaínona cüanona, jicanote: “¿Bue ñellena namonana jamai itomoi?”

⁷ Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijiai” llote.

⁸ Jitoma edacaidemo, naie patrón ie mullaímamo llote: “Maijirainina uaido. Jinafona maijiaidinona

raire nano iba. Ie mei jitiramo maijiaidinona jinafo iba” lloste.

⁹ Ie jira jinafona maijiaidinona nano ibade. Dabe ibade.

¹⁰ “Naimaci baifemo feiñoiticaí” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñotimaci.

¹¹ Ie jira naie patrón joreñona jeare ñaitimaci:

¹² “Jinafona maijiaidino dallu maijidimaci. Ecasilla facaise maijiñedimaci; iadedi namonana maijidicaí. Dani cai ibaja isoi ibadio” ñaitimaci.

¹³ Naimacimona damiemo naie patrón lloste: “Ero, ona jeare finoñedicue. ‘Omo daberie fa-caiticue’ omo lloticue. O dinena: ‘Jee’ raitio.

¹⁴ O ucubena jai o feiñua jira, mai jai. Cue jitailla jira, da o ibaja isoi dallu maijiaidinona ibadicue.

¹⁵ Cue ucubena jira, cue jitaille isoi cue ibaia, ¿niese cuena jeare ñaitomoi? Jiañona cue due-naillanona, ¿bue ñellena uradoidomoi? Mai jai” lloste. Jusiñamui ie cominina sedaacana omoi raise uiñollena, bie rafue jai lloticue.

¹⁶ Jamai bue isoidomoi. Omoimona jiaño jamai bue isoiñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

*Jesúdi ie fiodaillena dane llua rafue
(Mr 10.32-34; Lc 18.31-34)*

¹⁷ Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite.

¹⁸ Raite:

—Ero, Jerusalémo jai jaidicai. Monamona bilanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci.

¹⁹ Judíuaiñedino illaicominimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

*Jesús dine Jacobo Juan iaimaia ei billa rafue
(Mr 10.35-45)*

²⁰ Naie facaise Jesús dine Jacobo, Juan iaimaia ei diga, bitiaimaia. Iaimaia moodi Zebedeo. Jesús dine iaimaia ei rillanona, naimiena raise uaidollena, cañici ifodo ana rainadacaida llote:

—Omo daje rafue jicanoiacadicue.

²¹ Naiñaiño mo Jesús dinena jicanote:

—¿Bue ñiaibitio?

Naiñaiño uai ote:

—Illaimana o jailla mei, cue jito iaimaia o ecimo illana o llana jitaicue. Damie o nabeimo. Jiaimie o jarifebeimo. —Jiaino baifemo iaimaia illena, naiñaiño iese llote.

²² Naimacimo eruaillanona, Jesús dinena uai ote:

—O jitaillacinona raise uiñoñedio. Cue duere sefuiticue.

Naiñaiño jito iaimaiaimo jicanote:

—¿Ie isoi duere sefuiacadomico?

Uai otiaimaia:

—Jii.

²³ Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico

illena itatanidicue. Naie illano jai cue Moo finoca, nainomo iitino iena.

²⁴ Iena jiaie llofueoicaigano cacajano, naie iaiaiairi iciritimaci.

²⁵ Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci;

²⁶ iadedi omoi dine iese iñena. Omoimona bu imiēna iacania, omoi mullaimana naimie jaisoil-lasa.

²⁷ Omoimona bu imiēna iacania, omoina naimie canocana jaisoil-lasa.

²⁸ Cuenona fueo. Biñedicue cominina cue ocuil-lena; iadedi cominina canuaibidicue. Cue jitailla jira, nana comini facaina fioldaisaibiticue. Naimaci jeacinomona naimaci jillobillena, fioldaisaibiticue. Ailluena comini cuena inuamona jilloitimaci. Coninina omoi canua —llote.

*Jesús mena uisnidiaimaiaina jillotaja rafue
(Mr 10.46-52; Lc 18.35-43)*

²⁹ Jericó railla nairaimona jaidimacimo, ailluena comini naimaci jinafona racadimaci.

³⁰ Ie facaiseconi mena uisnidiaimaiaina fuemo raidiaimaiaina. Jesús naiedo jaillano cacajano, naimiēna ado uaidotiaimaiaina:

—David micori Jitona o illamona, Jusiñamuimona o billa jira, cocona duenai. Cocona cano.

³¹ Iaiaimaiaina llucaillena, Jesús diga jaidino iaiaimaiaina lletade; iadedi eo cuirioidiaimaiaina:

—Maestro, David micori Jitona o illamona, cocona duenai.

³² Iaiaimaiaina Jesús cacajano, ieconi naidadajanona, iaiaimaiaina uaidote. Jicanote:

—¿Niese omicono cue nibaiana jitaidomico?

³³ Uai otiaimaia:

—Maestro, coco uisina o cioitajana jitaidicoco.

³⁴ Iaimaiaina duenaillanona, iaimaiai uisina jetaide. Ieconia imaiaiai uisidi cide. Iaimaiai jai cianona, ie llofueganona iaimaiai jaillena, Jesús diga jaidiaimaiai.

21

*Jesús illaïma isoi Jerusalémo jailla rafue
(Mr 11.1-11; Lc 19.28-40; Jn 12.12-19)*

¹ Oni jaillanona, Jerusalémo iaieicaidimacimo, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiena orede.

² Raite:

—Bie nairai illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie iaïmaiaïna suiñuano bene ati.

³ Omicomo “¿Bue ñellena bie suiñodomico?” bu jicanoia, llono: “Coco Nama naie iaïmaiaïna jitaide. Nailli naimie iaïmaiaïna raire abido oretaite” —raite.

⁴ Jusinamui facaina lloaïma micori jaie llua isoi, bie rafue suide.

⁵ Naimie micori jaie cuete:

Jerusalén itinomo llono:

“Ero, omoi illaïma omoïna sedallena biite.

Abi iedoñeno biite.

Burra urue emododo naimie biite”
cuete.

⁶ Iaimaiai jaillanona, Jesús llua isoi finodiaïmaiai.

⁷ Burra ie urue diga atidiaïmaiai. Burra urue emodomo naimie llofueoicaigano naimaci iniroina jobianona, ie emodomo Jesús rainadate.

⁸ Naimiena iobitallena, illaïma isoi naimie jaillena, ailluena comini imaci iniroi diga, naiso motomo jobedimaci. Jiaino raforono uanona, naiso motomo jobedimaci.

⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraima billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caina jilloitajasa!

¹⁰ Jerusalémo naimie ridemo, nana nainomoto itino naie rafuena uifoiacadimaci.

—¿Buta bite? —jicanotimaci.

¹¹ Jesús diga bitino dinena uai otimaci:

—Jesús bite. Naimiedi Jusiñamui facaina lloraima. Galileamo ite Nazaret imie.

Jesúdi Jusiñamui jofomona damieriena dotaja rafue

(Mr 11.15-19; Lc 19.45-48; Jn 2.13-22)

¹² Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomoto ite. Jusiñamuimo ofomaiaïna fecallena, naimiemo toïca llaudaiaïna fecallena, nainomoto comini jaisoidimaci. Naie cominina ibatajanona, ofomaiaïna, toïca llaudaiaïa diga, damierie fecauidimaci. Iena Jesús ciuanona, naimaci mesaiaïna oni caicode. Ucugina fecauidino rairacuai jiaï oni caicode.

¹³ Naimacimotote:

—Ie facaina lloraima Jusiñamui llogacino jaie cuela: “Cue jofo ite, nainomoto cuemo comini jilla” cuela. Ero, ailluena omoi ibataja jira, naimie jofona firiruidino jofona omoi finoca.

14 Ie facaise uisínidino Jusiñamui jofomo naimie dine bitimaci. Ñuja-ñujacaida macaritino jiai bitimaci. Naimaci billanona, Jesús naimacina jillotate.

15 Nainomo Jesúdi diga mare rafuena finode. Diga cominina jillotate. Iena cüanona, nainomo ite uruiaí ado cuirisite:

—David micori Jitori iobidicai. Jusiñamui lloraini micoriai jaie llua isoi, cai Jilloitaraíma jai ite.

Iena cüanona, iena cacajanona, judíuai illaicomini iciritimaci.

16 Naimiemo jicanotimaci:

—¿Bie uruiaí cuirillana cacadio?

Jesús dinena uai ote:

—Jii, cacadicue. David micori iena jaie cuete. ¿Ñiese iena cacañedomoi? Naimie cuete:

Naimiemo Jusiñamuidi uruiaína mare iobillacinona fecataite.

17 Naimacina fainonocaida, Betaniamo Jesús jaide, nainomo inillena.

Jesús higuera railla riarana faidua rafue

(Mr 11.12-14, 20-26)

18 Ie areruido Jerusalémo abido ie llofueoicaigano diga Jesús bia, aimetaite.

19 Nai fuemo higuera railla riarana cüanona, iena jibuide. Naiemo naie llisilladi ñede. Dama ie ibena cide. Ie jira naie amenana llote:

—Biemona jaca llisiñeite. —Iese railla dacaiño naie riaradi duide.

20 Ie llofueoicaigano iena cüanona, rajjicaillamona raitimaci:

—¿Ñiese naie riar raire duide?

21 Jesús dinena uai ote:

—Uanaicinona omoimo lloiticue. Cue Moona raise omoi ñnoia, bie isoide rafuena finoitomoi. Raise omoi ñnoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaille rana finoite.

²² Naimie iena finuana omoi ñnuamona, nie isoide rafue cue Moomo omoi jicajia, iena naimie finoite.

Jesúdi ie siño uaina llua rafue

(Mr 11.27-33; Lc 20.1-8)

²³ Jerusalémo rillanona, Jusiñamui jofomo Jesús fo jailla mei, nainomo ite cominina llofujete. Judíuai illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁴ Jesús dinena uai ote:

—Omoimo daje rafuena nano jicanoiticue. Raise omoi fairioia, omoimo cue uaido cue finoca rafuena lloiticue.

²⁵ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori llua ñnoñedomoi?”

²⁶ “Comini” cai fairioia, bene itino caina ñibai meineitimaci, Juan micoridi Jusiñamui facaina lloraíma naimaci railla jira.

²⁷ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi mena jito iaimaia illa llua rafue

²⁸ Judíuai illaicominimo Jesús llote:

—Bie rafuemo omoi comeaiina faca. Damiemo mena jito ite. Nano doforamiemo llote: “Moo, cue illimo birui maijai”.

²⁹ Uai ote: “Jaiacaiñedicue” llote. Dallu illanona, ie comeina dane facajano, maijaide.

³⁰ Jiaie jitomo daje isoi llote. Naimie uai ote: “Jii, maijaiiticue” llote. Iese llote; iadedi maijaiñede.

³¹ ¿Nie jitoca ie moo jitailla rana finode? — jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoina ñaiticue. Omoimona marañedimaci; iadedi Jusiñamui cominina naimaci jaillamona, gobierno ucube oraini Jusiñamui illanomo iitimaci. Callirediñaiñuaidi nainomo jiai iitimaci; iadedi nainomo jaca iñeitomoi.

³² Marena omoi comeaiina itatallena, Juan micori navui bite; iadedi naimie micorina ñinoñedomoi. Ucube oraini naimie micori rafuena ñinotimaci. Callirediñaiñuai naimie micori rafuena ñinotimaci. Iena uiñotomoi; iadedi omoi comeiai iuaillaina meidoiñedomoi. ñinoñedomoi.

Jesúdi marañede maijiraini rafuena llua rafue
(Mr 12.1-12; Lc 20.9-19)

³³ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi

llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jiaimonio fecade. Ie mei jiaie eniruemo jaide.

³⁴ Uvas jai einailla facaise riaraiaina sedaraini dine naie patrón janore mullaiaina orede, naimie facaise iedinona naimie feiñollena;

³⁵ iadedi naie sedarainidi ie mullaiaina duere finosite. Daje mullaimana fatimaci. Jiaimiena meinetimaci. Jiaimiena noficina fairinotimaci.

³⁶ Ie mei patrón jiaie mullaiaina orede. Naimacina jai duere finodimaci.

³⁷ Ja muidomo ie jitona orede. “Cue jitona jaciruitimaci. Naimie uaina inoitimaci” comecina facade.

³⁸ Riaraiaina sedaraini naimiena ciuanona, coniniri raitimaci: “Bimemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci.

³⁹ Naimiena jino dotajanona, naimiena meinetimaci.

⁴⁰ Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono –llote.

⁴¹ Judíuai illaicomini uai otimaci:

—Naie marañedinona dueruiñeno meineite. Ie mei jiaie cominimo naie illi fecaite, iena sedallena, naiemona riarana feiñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraíma micori omoína jaie cuete. Ie cueba-fuena raise facañedomoi. Naimie micori ciega:

Jofu finoraini jitaíñena noficidi nana naie jofomoi
ite nofici baifemo jai uaide.

Jusiñamui iena finotate.

Iena cai uñuamona, “Eo mare” raiticai cuega. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena ñnuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

⁴³ Jusiñamuidi ie cominina sedajanomo omoina itatañeite; iadedi jiaie cominina nainomo itataite, naimie jitailla rafuena naimaci finua jira.

⁴⁴ Jesús llote:

—Naie noficina dane ñaiticue. Noficimo bu eicaitaia, bofedaite; ia naie nofici bumo ana uaia, naimiena saitaita. Ie isoide. Cue lluana omoi jamaia, duere sefuitomoi. Iena omoi ñnoñenia, ja muidomo faifitomoi.

⁴⁵ Jesús lluana naie judíuai illaicomini cacajanona, naimiedi naimacina ñaiana jai uñotimaci.

⁴⁶ Icirillamona, naimiena gaitacadimaci; iadedi cominina jaciruitimaci, cominidi naimie Jusiñamui facaina lloraimana raillanona.

22

Jesúdi illaima ie jito aina ua llua rafue

¹ Jusiñamui jofomo Jesús nia illanona, nainomo itinona llofueite:

² —Jusiñamui dibeimo comini jailla rafuena omommo lloiticue. Iena omoi uñollena, bie rafuedo iena lloiticue. Illaimadi ie jito ai ua rafue finode.

3 Naimie ie mullaini orede, rafuemo llogano uaidollena; iadedi nai llogano biacaiñedimaci.

4 Dane jiaie mullaini oretajano llote: “Nai lloganomo llono: ‘Rafue guille jai finocasa. Firetaiai, farediretaiai diga, jai faga. Jai nana fuite. Rafuemo mai bi’ ”.

5 Naimaci cacarefiacaiñede. Damie ie illimo jaide. Jiamie ie chinganamo jaide.

6 Jiano mullainina gaitadimaci. Gaitajanona naimaciri jifanotimaci. Ja muidomo naimacina meinetimaci.

7 Ie jira naie illaima eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate.

8 Ie meinoconi ie fiebide mullainimo llote: “Rafue guille jai nana finoca; ia llogano marañedimaci.

9 Naiso bojicaillanomo jai. Nana o ciolle diese llono: ‘Rafuemo bi’ llono”.

10 Ie jira ie mullaini jai naisona jaide. Marañedino baillanona diese ofitatimaci. Jiai maredino diese ofitatimaci. Rafue finua jofo naie llogano diga oruide. Illaima nainomo fecaca iniroina jitadimaci.

11 Illaima fo bia, mesamo itino jibuillena, dinomo daje ima rafue ie mare iniroina jitañenana cide.

12 Naimiemo jicanote: “Nabai, ¿niese bene rafue ie mare iniroina jitaño bitio?” jicanote. Naimie uainicaide.

13 Ie jira naie illaima ie mullaiaimo llote: “Naimie cuena ñoña jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga

duere sefuite. Jiaí sunaite” llote.

¹⁴ Ero, naie rafuemoná omoi fueo. Illaíma ailluena uaidote; ía nana biñedimaci. Ie isoide. Jusiñamui ailluena comínina uaidote; íadedi naimacimona janore fetode.

Jesúmo gobiernomo ucubena fecajana jicánua rafue

(Mr 12.13-17; Lc 20.20-26)

¹⁵ Naimacimo Jesús llua mei, fariseuai comíní abido jaillanona, coníniri siadotimaci. Naimie raise uai oñedena, naimiena duere finollena, Jesúsna facaciacadimaci.

¹⁶ Ie jira naimie díne naimaci comínimona dajerie oredimaci. Herodianuai railla comínina jiaí jaidimaci. Jesús díne rillanona, raitimaci:

—Maestro, uanaicinona llofuecabitío. Jusiñamui rafuedo cai marena jaillana raise llofuetío. Nana comíní dauaido llofuetío. Comínina iobitallena llofueñedío.

¹⁷ Omo rafuena jicanoiadicaí. Dani Jusiñamuina sedadicaí; íadedi romanos railla nairai anamo biruí cai illa jira, ¿naimaci illaíma Césarmo ucubena cai fecajana rairuidío? Caimo llono —llotimaci.

¹⁸ Naimaci comeciaina marañedicinona facajana Jesús uíñuamona, uai ote:

—¿Bue ñellena cuena facacitomoi? Maredinona abí caitadomoi.

¹⁹ Ucube cuemo acata —llote. Ie jira acatatimaci.

²⁰ Jesús dínená jicanote:

—¿Bu íe joreño nainomo íte? ¿Bumo jainaiáide bie cuega radi?

²¹ Uai otimaci:

—César.

Jesús dinena raite:

—César iena itedi Césarmo ille. Jusiñamui iena itedi Jusiñamuimo ille —raite.

²² Naimie lluaana cacajano, rajicaidimaci. Naimie jeare uai oñena jira, naimie dinomona oni jaidimaci.

Jesús dine saduceuai railla comini billa rafue

(Mr 12.18-27; Lc 20.27-40)

²³ Naie facaise saduceuai railla comini naimie dine bitimaci. Fiodaillamona jaca buna jilloñellena innotimaci. Jesúmo llotimaci:

²⁴ —Maestro, Moisés micori jaie cueba: “fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cueba.

²⁵ Ero, cai motomo siete amatiai ite. Nano doforamie ie aina ote. Naimie nia uruiainide fiodailla. Ie emodo imie ie ama feciñona ote. Uruiaide jiai fiodailla.

²⁶ Naie siete digamiedemona iese sefuide.

²⁷ Ja muidomo naie riño jiai fiodaite.

²⁸ Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

²⁹ Jesús uai ote:

—Moisés micori cueba fuaiaina raise omoi uiñoñena jira, Jusiñamui uaina raise omoi uiñoñena jira, bie isoide rafuena raise uiñoñedomoi.

³⁰ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi iitimaci.

31 Fiodaitino jilluana omoimo lloiticue. Jusiñamui omoi jaiagaimo jaie llogacinona inoñedomoi. Naimie llote:

32 “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi dani cagedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite –llote.

33 Nainomo ite comini iena cacajano, naimie llofuiari rajicaidimaci; ia saduceuai dinena uainicaidimaci.

Jesús nanoca llogacinona llofuiara rafue
(Mr 12.28-34)

34 Saduceuai comini uainicaillana fariseuaidi jai fidiano, Jesús dine ofidimaci.

35 Naimacimona damiedi Moisés micori jaie llogacinona eo uiñote. Jesúsna facacillena, naimiemo jicanote:

36 –Maestro, Moisés micori jaie llogacinuaimona, ¿nie llogacino ua nanoca llogacinona?

37 Jesús dinena uai ote:

–Moisés micori jaie cuela: “Omoi jitailla jira, nana omoi comecimona cai Nama Jusiñamuina isirui. Naimiemo omoi comecina eo faca”.

38 Bie ua nanoca llogacino.

39 Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”.

40 Bie mena llogacinomona nana jiaie llogacinuai comuide. Nana Moisés micori llogacinuai naiemona comuide. Nana Jusiñamui

facaina lloraini micoriai llogacinuai naiemona comuide –llote.

*Jesús dinena fariseuai cominimo jicanua rafue
(Mr 12.35-37; Lc 20.41-44)*

⁴¹ Naimie dine nia fariseuai comini ia, Jesús naimacimo llote:

⁴² –Jusiñamui lloraini micoriai jaie raitimaci: “Jusiñamuidi Cristo raillamiena oretaite, ie cominina sedallena”. ¿Niese naimiena raitomoi? ¿Bu jito naimiedi?

Uai otimaci:

–David micori jito. David micori isoi Cristo ie cominina sedaite.

⁴³ Jesús dinena jicanote:

–Naimiedi David micori isoidena, ¿bue ñellena David micori “Cristodi cue Nama” llote? Jusiñamui Joreñodi David micori ñaitatajanona, David micori llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai. Ona ñinoñedino o anamo itataiticue”.

⁴⁵ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

23

*Jesúdi judíuai illaicominina ñaia rafue
(Mr 12.38-40; Lc 11.37-54; 20.45-47)*

¹ Jusiñamui jofomo Jesús nia illanona, naimie dine ailluena comini bitimaci. Ie llofueoicaigano nainomo jiai illanona, nana naimacimo llote:

2 —Moisés micorí llogacínuaína llofuerainidi naie rafuedo jai jaicabidimaci. Fariseuai cominí iedo jiaí jaicabidimaci.

3 Naimaci llofuiacínodo omoi jai. Naimaci llofuiana omoi cacarefi; iadedí naimaci illa isoi omoi iñeno, naimaci llofuiacínodo naimaci jaiñena jira.

4 Omoi einamací llogacínuaído raise omoi jaillena, diga rafuena omoi finuana jitaidimaci; iadedí iedo omoi jaillena, omoína jaca canoñedimaci. “Jusiñamuina eo raise sedadicaí” comecina facadimaci. Iemo naimaci comecina facajamona,

5 iena omoi cioillena, nana naimaci finua rafuena marefodo finodimaci. Jiaíe cominimo ite Jusiñamuimo jürabe baifemo faitibena uiacacabidimaci. Iniroi fuedadi aillofena jonegana gaidimaci.

6 Rafue ia, naimaci jamai bue isoiñedinomo comecina facajanona, rafue nama ecimo raiacadimaci. Ofiracomo uicomo raiacadimaci, cominí naimaciri acarillena.

7 Nine naimaci jaia, nana cominí naimacina uaiduana gaidimaci. Maestrodicínona uaiduana jiaí gaidimaci.

8 Jusiñamuina eo raise naimaci sedajana omoi uiñuana jitaidimaci. Naimaci isoi iñeno. Omoi damacina jira, omoímona damíe omoi baifemo faiamo comecina facañeno. Naimiēna maestrōna raiñeno. Omoi baifemo cue illanona, omoi maestrodicue.

9 Omoi Moo Jusiñamui monamo illanona, dama naimiēna seda. Jiaimīēna sedañeno. Jusiñamui isoi jiaimīēna “Moo” raiñeno.

10 Omoï damacina jira, omoïmona damiena “Cai illaïma” raiñeno. Omoï illaïmana jai iticue.

11 Omoïmona bu imiena jaiacania, omoï mullaïmana naimie nano jaillamona, omoïna naimie canua.

12 Jusiñamuidi “Jiaino afemo iticue” raillano comecina facadimiena jamai bue isoidimiena itataite; ia Jusiñamuidi “Jiaino afemo iñedicue” raillano comecina facadimiena jamai bue isoïñedimiena itataite.

13 Naie facaise Moisés micori llogacinona llo-fuerainidi fariseuai comini diga illanona, Jesús naimacimo llote:

—Jusiñamui omoïna duere finoite. Mareuidinona abi caitadinodomoï. Jusiñamui dibeimo comini illana jitaiñedomoï. Naimie dibeimo omoï illana jiai jitaiñedomoï. Ie muidona Jusiñamuimona duere sefuitomoï.

14 “Jusiñamuina eo sedadimaci” omoïmo comini comeciaina facajana jitaïdomoï. Ie jira are jiidomoï; iadedi iese iñedomoï. Maraiñede rafuena finocabidomoï. Jifuianona feciñuai rana bairocabidomoï. Ie jira Jusiñamui omoïna eo duere finoite.

15 Damiena omoï dibeimo itatallena, omoï isoi Jusiñamui rafuedo naimie jaillena, diga rafuena finodomoï. Omoï dibeimo illa mei, omoï bai femo omoï einamacï llogacinodo naimie jaillana jitaïdomoï. Omoï diga ico naimie ua faifite. Cominina uanaiñedicinodo jaitatomoï. Iese omoï illa jira, duere sefuitomoï.

16 ‘Omoï llofuiacino diga cominina canoñedomoï. Mareuidinona abi caitadinodomoï. Raicabitomoï: “Cai lloga uai cai finollena jiai comini uiñollena,

Jusiñamui jofomo ite oro mamecina llinotica; iadedi Jusiñamui jofo mamecina cai llinoia, cai lloga uaina cai finoñenia, caimona mare. Jusiñamuimona duere sefuiñeiticai” raicabitomoi.

17 Abi uiñoñedomoi. Omoi llofuiacino diga cominina canoñedomoi. Jusiñamui jofomo naie oro jainaiaila jira, naie orodi mare; iadedi naie oro naie jofo baifemo uaiñede. Abina omoi uiñoñena jira, Jusiñamui omoi na duere finoite.

18 Jiai raitomoi: “Jusiñamuimo faga toica ocaina jobaisoillano mamecina cai llinoia, cai lloga uaina cai finoñenia, caimona mare; iadedi Jusiñamuimo fecaca toica ocaina mamecina cai llinoia, cai lloga uaina jaca finoitica”.

19 Abi uiñoñedomoi. Omoi llofuiacino diga cominina canoñedomoi. Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede.

20 Ero, Jusiñamuimo ocaina jobaisoillano mamecina omoi llinoia, nainomo ite ocaina mamecina jiai llinotomoi.

21 Jusiñamui jofo mamecina omoi llinoia, Jusiñamui nainomo illa jira, naimie mamecina jiai llinotomoi.

22 Monamo ite ra mamecina omoi llinoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomoi. Omoi llua rafuena omoi finoñenia, Jusiñamui omoi na duere finoite.

23 Mareuidinona abi caitadinona omoi illamona, omoi mo nia lloitie. Nana omoi illimo ite ramona, nana omoi mo ite ucubemona Jusiñamuimo janore jisa fecacabidomoi. Nana comini omoi isoi

illena jitaïdomoi. Mare; iadedi nanoca rafuena jaca finoñedomoi. Jiaie cominimo omoi comecina facañedomoi. Jiaie cominina duenaiñedomoi. Omoi lloga uaina finoñedomoi. Nana naie isoide rafuena omoi jiai finua. Iena omoi finoñenia, Jusiñamui omoïna duere finoite.

²⁴ Abina uiñoñedomoi. Jallecima jiroracomo ia, iena oni faiga; ia aillue ra nainomo ia, iena cioiñeno namo gutadomoi. Ie isoide. Omoi llofuiacino ðiga cominina canoñedomoi. Jusiñamui ie eo jitailla rafuedo comini jaillana llofueñedomoi. Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

²⁵ 'Omoïmo nia lloiticue. Omoi einamacï llogacïnodo eo jaidomoi; iadedi omoi comeciaina raise finoñedomoi. Eo fïdomoi. Jifuianona comini rana bairodomoi. Jeacinona finocana jaidomoi.

²⁶ Abina uiñoñedomoi. Da pocillos jinafo, da platos jinafo jocodino isoidomoi. Pocillos jeraï, platos jeraï jocoñedino isoidomoi. Omoi abina finodomoi; iadedi omoi comeciaina raise finoñedomoi. Nano omoi comecina raise fino. Mare rafue finocana jai. Omoi einamacï rafuemo comecina facañeno; ia Jusiñamui rafuemo comecina faca. Iese omoi jaiñenia, Jusiñamui omoïna duere finoite.

²⁷ 'Omoïmo nia lloiticue. Marena finoca raiïafo isoidomoi. Jinofe marena eruaïde; iadedi nainomo mare ra iñede. Comini illaïci jamai ite. Jai maraiñede.

²⁸ Ie isoidomoi. Marena eruaïdomoi; iadedi maredinona abi eo caitadomoi. Omoi comeciï eo

maraisiñede. Omoi comecina raise omoi finoñenia, Jusiñamui omoi na duere finoite.

²⁹ 'Omoimo nia lloiticue. Naimacimo birui omoi comeciaina raise facallena, Jusiñamui facaina lloraini micoriai raiafona marena eruaillena finodomoï. Mareuidino micoriai raiafo emodo marena eruaillena finodomoï,

³⁰ raillano: "Cai jaiagai Jusiñamui facaina lloraini micoriaina meinetimaci. Naie facaiseconi iticaïdena, naimaci isoi finoñedicaï. Cai jaiagai isoi birui iñedicaï" raitomoï;

³¹ iadedi omoi lluamona Jusiñamui facaina lloraini micoriai meinetino uruiaï omoi na uiñoticaï.

³² Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai.

³³ Omoi maraiñena jira, jaio nairaï isoidomoï. Ja muidomo iraimona jillobiñeitomoï. Nainomo duere sefuitomoï.

³⁴ Cue rafuena lloïlloï, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraini omoi dine jiaï oretaiticue. Dajeriena meinetitomoï. Naimacina coraititomoï. Omoi ofiracomo dajeriena faitomoï. Diga nairaimo naimacina duere finoitomoï.

³⁵ Abel micori jaie ite. Naimie maremie. Ie ama naimiena meinete. Naimie facaisemona omoi jaiagai ailluena mare cominina meinetimaci. Ie mei omoi jaiagai Zacaríana meinetimaci. Naimiedi Berequíás jito. Jusiñamui jofomo Jusiñamuimo toica ocaina jobaisoillano ecimo naimiena meinetimaci.

³⁶ Uanaicino omoimo lloiticue. Naimacina omoi

jaiagai meinia muidona, omoimona Jusiñamui birui ibana oite. Naimaci isoi maraiñede rafuena finocana jaidomoi. Jusiñamui omoina duere finoite.

*Jesús Jerusalémo itinomo llua rafue
(Lc 13.34-35)*

³⁷ Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie urui sedaja isoi, diga icaiño cue anamo omoina uaidoiadicue; iadedi omoi dinena cuena jitañedomoi.

³⁸ Iemona Jusiñamuidi omoi illanona jai fañonocaide.

³⁹ Cue Moo dine jaiticue. Cue jailla mei, cuena cioiñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

24

Jesúdi Jerusalémo ite Jusiñamui jofo judaiana llua rafue

(Mr 13.3-23; Lc 17.22-24; 21.5-24)

¹ Jusiñamui jofomona ie llofueoicaigano diga Jesús jino jaidemo, Jesúsna nai jofona eruaitatimaci.

² Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite noficiái ico judaisite —llote.

³ Ie mei Olivos railla anedu dine rillanona, Jesús naie muidomo raïdemo, ie llofueoicaigano naimïemo iena anado llotïmaci:

—Jusiñamui jofo judaïana omo jïcanoiacadïcai. ¿Nïruido iena suite? Caimo llono. O abïdo billirui iaïrei ia, ¿nie isoide rafue suite, o abïdo billiruina cai uiñollena?

⁴ Uai ote:

—Omoïna bie rafuena bu jïfueñellena, omoï abïna rairui.

⁵ Ailluena comïni cue mamecido billanona: “Cristodicue” raitïmaci. Dïga comïnina jïfueitïmaci. Iemona omoï abïna rairui.

⁶ Jobaimiaï illena fidïtomoi; iadedi jacïruiñeno. Iese suite; iadedi abïdo nia biñeiticue.

⁷ Daje nairaï jiaïe nairaï diga jobairitïmaci. Daje gobierno jiaïe gobierno diga jobairite. Diga illanuaïmo comïni aime guitïmaci. Diga illanuaïmo ñuisañuaï suite.

⁸ Iese suia, omoï duere sefuillïfue omoïmo suite.

⁹ 'Cuena ñinoñedïno omoïna gaitatajanona, omoïna meineitïmaci. Cue comïnina omoï illamona, nana nairaïaï omoïna enoitïmaci.

¹⁰ Naie facaise cue dïbeïmo itïnomona ailluena abïdo danomo jaitïmaci. Iemona duere omoï sefuillena, omoïna janoñeïtïmaci; iadedi omoïna enoïllamona, omoïna llogidoitïmaci.

¹¹ Naie facaise diga comïni raitïmaci: “Jusiñamui facaina llorainïdïcai”; iadedi Jusiñamui facaina llorainïñedïmaci. Uanaicïnona lloñeïtïmaci. Diga comïni naimaci dïbeïmo itataitïmaci.

¹² Jeacïno eo comuicana jailla jira, ailluena comïni conïni isiruiñeïtïmaci;

13 iadedi cuena fañonocaiñedimie ja muidomo monamo jaca iite. Naimiena jillotaiticue.

14 Diga cominidi Jusiñamui dibeimo comini ille rafuena nana nairaimo lloitimaci, nana nairaiia iena cacaillena. Ie mei abido biiticue.

15 'Cue lluomo cacarei. Daniel micoridi Jusiñamui facaina lloraima. Naimie micoridi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi cianona,

16 naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi.

17 Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno.

18 Aneduai dine raire rillena, illimo omoi ia, abido jofomo biñeno, omoi iniroi omoi diga uillena.

19 Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite.

20 Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micoridi sábadomo are jaillana jaie rairuide. Sábadoruimo bie rafue suiñellena, Jusiñamuimo jicano.

21 Naie facaise comini eo duere sefuitimaci. Enirue finua facaisemona iese comini nia duere sefuiñedimaci. Ico iese eo duere sefuiñeitimaci.

22 Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

23 'Ie facaise omoimo bu raia: “Jadi, Jusiñamui facaina lloraima benomo birui bairede. Naimiedi Cristo”, iena ññoño. Jiaime raia: “Oni batine Cristo birui bairede”, iena ññoño.

24 Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci.

25 Ero, bie rafue nia suiñenia, iena omoimo jai lloticue.

26 Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena ññoño.

27 Mona borillamona mona jillacidi usere ciode. Nana cominimo bairede. Ie isoide. Cue abido bia, nana comini iena uiñoitimaci.

28 Urujaisai rifaide ramo ofillana uiñua isoi, nana cuena ñnotino cue billena uiñoitimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

29 Jesús llote:

—Naie duere sefuilla facaise meinoconi jitoma lligaiñoñeite. Fivui jiai lligaiñoñeite. Monamona ucuai llujite. Nana naie radi jaidisite.

30 Ie mei monamo baireiticue. Ieconi nana nairaijai jarire iitimaci. Jacinaitimaci. Uillie motodo cue billena cioitimaci. Ebire biiticue. Naimacina cue sedallena, illaimana biiticue.

31 Cue jaienisaina cue ecimona oretaiticue. Ado trompeta ficiretajano, cue fetocano diese naganomona ofitaitimaci.

³² 'Higuera railla riaramona omoï fueo. Bie eniruemo naie riara firuillamona, fiemona raire illana uiñotomoi.

³³ Ie isoide. Bie rafue ico suia, cue billirui iaïrei illena uiñoitomoi.

³⁴ Uanaicinona omoïmo lloiticue. Nana bie rafue suille facaiseconi bie nairai nia iite.

³⁵ Mona enirue diga fuite; iadedi cue lloga uai jaca suite.

³⁶ Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote.

³⁷ Abido cue billirui iaïrei ia, Noé micori facaiseconi itino isoï comini iitimaci. Naimaci duere sefuillemo Noé micori facaise itinodi comeciaina facañedimaci.

³⁸ Naie facaiseconi nia eo noci deiñenia. Noé micori ecimo itino naimaci isoilla isoï icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori.

³⁹ Nia noci deiñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

⁴⁰ Naie facaiseconi menamie illimo danomo iitiaimaiaï. Damie Jusiñamui dne jaite. Jiamie fiebillanona, Jusiñamuimona duere sefuite.

⁴¹ Mena riño danomo doberitiaiñuai. Dañaiño Jusiñamui dne jaite. Jiaiñaiño fiebillanona, Jusiñamuimona duere sefuite.

⁴² Cue billirui omoï uiñoñena jira, iemo ocuiri.

⁴³ Bie rafuemo omoï comeciaina omoï faca. Jofu

namadi fñiriraima nie naiona billena uiñotena, ie rana faifiñellena, ie jofona raise sedade.

⁴⁴ Ie isoi cue billemo ocuiri. Monamona ico abido biiticue. Omoi ocuiriñena facaisemo riiticue. Ie jira cue billemo nagarui ocuiri.

Jesúdi patrón ie mullaimana ie jofona sedataja llua rafue

(Lc 12.41-48)

⁴⁵ Jesús llote:

—Cue billena omoi raise cacaillena, jiaie rafuedo iena lloiticue. Patrón daje mullaimana ie jofona sedatate. Naie mullaïma ñnogamie. Abina uiñotimie. Nainomo itinona raise ecacabide. Naie mullaïmana ie jofona sedataja mei, naie patrón oni jaide.

⁴⁶ Patrón ico abido bia, ie jofona ie mullaïma raise sedaia, mullaïmari naimie iobillamona, ie mullaïma marena iite.

⁴⁷ Iobillamona, patrón ie mullaïmana nana ie raruiaina sedatataite;

⁴⁸ Iadedi ie mullaïma maraiñenia, ie começina facaite: “Cue patrón are biñeite. Naimie lloga uaina fiñoñeiticue”.

⁴⁹ Ie começina iese facaja jira, naimie anamo ite mullaïaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena fiñoite.

⁵⁰ Ie ocuiriñena facaise ie patrón abido billanona, naimiena duere fiñoite.

⁵¹ Ie isoide. Cue abido bia, cuena ñnotinori iobiticue; ia cuena ñnotinona abi caitadino dine cuena ññoñedinona dotaiticue. Nainomo duere sefuillano eetimaci.

25

Jesúdi diez jitaiñuaina llua rafue

¹ Jesús llote:

—Abido cue bia, Jusiñamui ie cominina sedaite. Cue billemo ocuritinona sedaite. Naie facaise ite cominidi diez jitaiñuaimo ite rafue isoidimaci. Naiñaiñuai lamparíniai llinuanona, ima ie aina ua meinomo finoca rafuemo jaiacadimaci.

²⁻⁴ Lamparíniai unellena, farena naiñaiñuai uilla jira, cinco diga abina uiñotimaci. Farena naiñaiñuai uiñena jira, cinco diga abina uiñoñedimaci.

⁵ Ima diga ie rafue dine jaillemo ocuridimaci. Ima are biñena jira, inidimaci.

⁶ Daje dberuisse damie ado lluana cacadimaci. Llote: “Jadi, naie imadi jai bite. Mai bi, naimie uicomo naimiemo cai dafaiñillesa”.

⁷ Casillanona, naie jitaiñuai lamparíniai unedimaci.

⁸ Abi uiñoñediñaiñuai dinena abi uiñotiñaiñuaimo jicadimaci: “Farena caimo feca. Cai lamparíniai boacaiñedes”.

⁹ Uai otimaci: “Fecaacaiñedicaí. Omoimo cai fecaiadedi, caimo baiñeite. Omoí jitaia, chinganomo ibajai”.

¹⁰ Naiñaiñuai ibajailla mei, naie ima ride. Naimiemo ocuridiñaiñuai diese naimie diga nainomo guillena, rafuemo jaidimaci. Naimaci fo jailla mei, nase naie ima ibaide.

¹¹ Ie mei naie farena ibajaidiñaiñuai abido bil-lano, raitimaci: “Nase econo”.

¹² Naie ima uai ote: “Uanaicinona omoimo lloiticue. Omoína uiñoñedícue. Econoñeitícue”.

13 Ie isoide. Cue billiruina omoi uifioñena jira, nagarui cuemo omoi ocuiri.

Jesúdi patrón ie mullaiaimo ucubena fecaja llua rafue

14 Jesús llote:

—Abido cue bia, Jesiñamui ie cominina sedaite. Naie facaise ite comini daje patrómo ite rafue isoide. Patrón jiaie enirue jaiacana jira, ie mullaiaina ie ucubena eenotade.

15 Damiemo cinco diga ucubena fecade. Jiaimiemo menacubena fecade. Jiaimiemo dacubena fecade. Nagamie ie maijille dinori fecade. Ie mei oni jaide.

16 Cinco diga ucubena feiñotimie jaillanona, iena fecallena, rana ibade. Iemona jiaie cinco diga ucubena ote.

17 Menacubena feiñotimie iena fecallena, rana ibade. Iemona jiaie menacubena ote.

18 Dacubena feiñotimie eniruemo naie ucube eenote. Iena fecallena, rana ibañede. Iemona buena oñede.

19 Digarui illanona, naie patrón abido bite. Naimaci cuentas siadollena, ie mullaiaina uaidote.

20 Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”.

21 Patrón uai ote: “Raise marena maijidio. Eo mare mullaimadio. Janore ucube o raise sedaja jira, ona ailluena rana sedataiticue. Cue diga caimare jaca iitio”.

22 Menacubena feiñotimie bite. Raite: “Patrón, cuemo menacubena fecadio. Iemona jiaie menacube oticue”.

23 Naimie patrón uai ote: “Raise marena majidio. Eo mare mullaímadio. Janore ucube o raise sedaja jira, ona ailluena rana sedataiticue. Cue diga caimare jaca iitio”.

24 Daucubena feiñotimie bite. Raite: “Patrón, o rirenana uiñoticue. O mullaiai majiamona ganacabidio.

25 Ucubena cue faifiñellena ona jacircuiticue. Ie jira eniruemo o cuemo iga ucubena eenoticue. Jai, iena jai abido atidicue”.

26 Patrón uai ote: “Maraiñedio. Rairaiedio. Cue mullaiai majiamona cue ucube uana uiñotio.

27 Bancomo naie ucubena jonetiodena, naie ucubemona jiaie ucube janore uamona, abido cue bia, iena feiñoticue”.

28-30 Ie mullaiaimo llote: “Naimiemona ie ucubena bairo. Diez ucube illamie mo iena feca. Bie maraiñede mullaiaimo jitiñedonomo cuemona oni dota. Nainomo comini duere sefuillanona eitimaci”. Jusiñamui ie jitailla rafuena finodina: “Mare” raite; iadedi ie jitailla rafuena finoñedina duere finoite. Jusiñamui omoina duere finoñellena, cue abido billirui omoi uiñoñena jira, Jusiñamui jitaillacina finocana omoi jai.

Jesúdi cominina duere finolle llua rafue

31 Jesús llote:

—Omoina nia llofueiticue. Abido cue bia, nana cue jaienisaí diga biiticue. Illaimana ico cue bia, illaia illa ifomo iiticue. Eo siño uaido biiticue.

³² Cue uicomo nana nairaia ofitimaci. Toica llaudaia sedaraima ie chivos motomona ie llaudaia oni fetua isoi, naimacina fetoitucue.

³³ Cue jitaillacinona finodino diese cue fetuanona, cue nabeimo itataitucue. Cue jitaillacinona finoñedino diese cue fetuanona, cue jarifebeimo itataitucue.

³⁴ Cue illaimana jira, cue nabeimo itinomo lloiticue: “Cue Moo omoiri iobillanona, omoina jai caimare itatate. Cue Moo cominina omoi illa jira, cue sedajano mai bi. Nainomo duidomoi.

³⁵ Cue jitaillacinona omoi finuamona navui aimetaitucue, cuena ecadomoi. Jiroacaducue, jinui cuemo fecadomoi. Omoi naira dine cue macaria, cuena omoi uiñoño omoi jofomo cuena feiñotomoi.

³⁶ Iniroiniducue, iniroi cuemo fecadomoi. Duiducue, cuena canollena, cuena jibuisaibidomoi. Cárcelmo itucue, cuena canollena, cuena jibuisaibidomoi”.

³⁷ Cue jitaillacinona finodino dinena cuemo jicanoitimaci: “Nama, ¿Niruido aimetaitomo, ona ecadicaí? ¿Niruido jiroacadomo, jinui omo fecadicaí?

³⁸ ¿Niruido ona ciodicaí, cai jofomo ona feiñollena? ¿Niruido iniroina omo fecadicaí?

³⁹ ¿Niruido duidomo, ona jibuisaidicaí? ¿Niruido cárcelmo itomo, ona jibuisaidicaí?”

⁴⁰ Uai oiticue: “Uanaicinona omoimo lloiticue. Cuena inotinomona jamai bue isoidimiena canodomomo, cuena jiaí canodomoi” lloiticue.

⁴¹ Temei cue jarifebeimo itinomo lloiticue: “Cue-mona oni mai jai. Cue comiñedomoi. Jai faifidomoi. Duere omoi sefuillena, iraimo mai jai.

Naie irai jaca duiñede. Jusiñamuidi naiena Taife iena jai finode. Jusiñamuidi Taife comini iena jiai jai finode.

⁴² Cue jitaillacinona omoi finoñenamona, navui aimetaiticuomo, cuena ecañedomoi. Jiroacadicutuemo, jinui cuemo fecañedomoi.

⁴³ Omoi nairai dine cue macaria, omoi jofomo cuena feiñoñedomoi. Iniroinidicutuemo, iniroi cuemo fecañedomoi. Duidicutuemo, cuena canollena, cuena jibuisaibiñedomoi. Cárcelmo iticutuemo, cue canollena, cuena jibuisaibiñedomoi”.

⁴⁴ Cuemo jicanoitimaci: “¿Niruido aimetaitiomo, ona ecañedicai? ¿Niruido jiroacadiomo, jinui omo fecañedicai? ¿Niruido ona ciodicai, cai jofomo ona feiñoñollena? ¿Niruido iniroinidiomo, omo fecañedicai? ¿Niruido duidiomo, ona jibuisaiñedicai? ¿Niruido cárcelmo itiomo, ona jibuisaiñedicai?”

⁴⁵ Uai oiticue: “Uanaicinona omoimo lloiticue. Diga comini cuena inotimaci. Naimacimona jamai bue isoidimiena omoi canoñena jira, cuena canoñedomoi” lloiticue.

⁴⁶ Naimaci jaca isi cacaitimaci; iadedi cue jitaillacinona finodino cue Moo sedajanomo jaca iitimaci.

26

*Judíuiai illaicomini Jesúna gaitallena siadua rafue
(Mr 14.1-2; Lc 22.1-2; Jn 11.45-53)*

¹ Ie llofueoicaiganona llofuia mei, naimacimo Jesús llote:

² —Pascua raila rafue illena, menarui fiebide. Iena uiñotomoi. Monamona jaie cue billamona,

imana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote.

³ Naie facaiseconi Jusiñamui diga nanoca ñairainidi, jiaie illaicomini diga, nanoca ñairaima jofomo ofidimaci Nanoca ñairaimadi Caifás.

⁴ Jesúna jifuiano gaitallena coniniri siadotimaci. Naimiena meinellena jiai siadotimaci.

⁵ Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuitimaci. Nia sedaiticai.

*Jesúmo riño caimare soride ra totaja rafue
(Mr 14.3-9; Jn 12.1-8)*

⁶ Betania railla nairaimo Jesús jaillanona, Simón jofomo jaide. Simódi jaie efonaitimie.

⁷ Naifomo mesamo Jesús guitemo, daje riñodi noficimona finoca frasco atiano, naie frasco llailanona, nainomo ite caimare soride ra naimie ifogimo totade. Naie ra eo raifide.

⁸ Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide.

⁹ Iena fecacadena, eo ailluena raifide. Naie ucube dueredinomo fecadena, caimona mare.

¹⁰ Naimaci ñaiana Jesús uiñua jira, naimacimo llote:

—¿Bue ñellena naiñaiñona jeare ñaitomoi? Mare rafuena cuemo finode.

¹¹ Omoi diga dueredino jaca itimaci; iadedi omoi diga jaca iñeiticue.

12 Cue abimo bie caimare soride ra naiñaiño totajamona, cue fiodaillirui facaina naiñaiño iese finode.

13 Omoimo uanaicinona lloiticue. Ninomo cue mare finoca rafuena bu lloia, naiñaiña uibiñollena, nana cominimo naiñaiño finoca rafuena lloite.

Judas micori raillamie Jesúsna gaitataiacana rafue

(Mr 14.10-11; Lc 22.3-6)

14 Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide.

15 Naimacimo jicanote:

—Omoimo Jesúsna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci.

16 Naie facaiseconimona Jesúsna gaitatalliruimo naimie ocuiride.

Jesúdi ie fiodaille rafuena llua rafue

(Mr 14.12-25; Lc 22.7-23; Jn 13.21-30; 1 Co 11.23-26)

17 Pascua railla rafue ia, siritaga rana guiñedimaci. Dani llomeniconona guitimaci. Egiptomona cai jaiagai jillobillana comecillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

18 Uai ote:

—Jerusalémo omoi jaillanona, omoimo cue llogamiena omoi cianona, naimiemo llono: “Cai llofueraima fiodaille facaise iairei ite. O jofomo ie

llofueoicaigano diga pascua rafuena finoacade” llono.

¹⁹ Ie muidona ie llofueoicaiganodi ie lluana finodimaci. Pascua railla rafue guille finodimaci.

²⁰ Nairui jitoma ana itemo, Jesús ie doce llofueoicaigano diga nainomo guisaide.

²¹ Naimaci mesamo guitimacimo, Jesús llote:

—Omoimona damie cuena gaitataite —llote.

²² Iena cacajanona, eo sunaitimaci. Damierie naimiemo jicanoside:

—¿Cuena ñaitio?

²³ Uai ote:

—Omoimona damie bie platomo cue diga llomenico diga mutade.

²⁴ Jusiñamui facaina lloraima cuega isoi, monamona jai billamona fiodaiticue; iadedi cuena gaitataitimie eo duere sefuite. Naimie jeiciñegadena, cuemona mare.

²⁵ Jesúna gaitataitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

²⁶ Naimaci nia guitimacimo, llomeniconona Jesús llinuanona, Jusiñamuimo iobillacinona fecaja mei, llomeniconona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

²⁷ Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecajano, raite:

—Biemona nana omoi jiro.

²⁸ Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. Cue llua isoi bie vinona omoi jiruamona, cue fiodaillamo omoi comeci.

²⁹ Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue. —Iena jirodimaci.

*Jesúdi Pedro naimi ena janua na llua rafue
(Mr 14.26-31; Lc 22.31-34; Jn 13.36-38)*

³⁰ Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci.

³¹ Jesús naimacimo llote:

—Cuemo suille rafue muidona, ja naio cuena fañonocaitomoi. Jusiñamui facaina lloraima micori iena jaie cueda: “Toica llaudaia sedaraimana meinetaicue. Naimie toinaia uaficaida jaitimaci” cueda. Naimie micori caina cuete.

³² Ero, fiodaillamona cue jillua mei, omoi uicodo Galileamo jaiticue, nainomo omoi diga dafai fillena.

³³ Pedro uai ote:

—O finolle rafue muidona nana jiaino ona fañonocaia, ona jaca fañonocaiñeiticue.

³⁴ Jesús dinena raite:

—Uanai omo lloiticue. Ja naio itava nia ñaiñenia, dacaiño amani cuena janoitio.

³⁵ Pedro uai ote:

—O diga cue fiodaia dedi, ona janoñeiticue.

Nana ie llofueoicaigano daje uaido jiaí raitimaci.

*Jesúdi Getsemanímo Jusiñamuimo jia rafue
(Mr 14.32-42; Lc 22.39-46)*

³⁶ Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Benó ana raí. Omoimona oni baí janore jaiticue. Cue Moo diga ñaillena, jaiticue.

³⁷ Pedrona uite. Zebedeo ie jito iaímaiaina jiaí uite. Naimie sunaicaide. Ie comeci uri iñede.

³⁸ Naimacimo llote:

—Cue comeci sunaicaide. Niadí fiodaiticue. Benomo fiebi; ia nia iniñeno cue facaina omoí jii.

³⁹ Naimie janore baí jaillanona, eniruemo bitadate. Jiide:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jiide.

⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niese raire inidio? daje hora nia iñedemo.

⁴¹ Iniñeno. Taife ramo omoína faí raillano, iena omoí ñnoñellena, Jusiñamuimo jii. Omoí comeci mare rafuena finoacade; iadedi omoí comeci dani ocuiñoñede. Ie muidona Jusiñamuimo jii, omoína naimie ocuiñotallena —llote.

⁴² Ie mei dane jillena jaide. Raite:

—Ore Moo, o jitaia, cue duere sefuillamona cuena jillota. Cue fodaillana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi llirioilla jira, naimaci inisitemo ride.

44 Abido jaillanona dane jide. Ailli daje isoiduaido jide.

45 Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fioidaicue. Cuenaj gaitajanona, Jusiñamui jitailla jira, naimiena inoñedino anamo ja iticue.

46 A naidacai. Maiña. Cue gaitataitimie jai bite.

Jesúna gaitalle rafue

(Mr 14.43-50; Lc 22.47-53; Jn 18.2-11)

47 Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jai atidimaci. Jusiñamui diga nanoca ñairainimona bitimaci. Einamaci dinena jai bitimaci.

48 Jesús dine naimaci nia riñenia, Judas micori naimie diga bitinomo jai llote:

—Jesúna omoi uinollena, naimiena llibanoiticue. Ie mei naimiena gaita —llote.

49 Jesús dine naimaci rillanona, Judas micori Jesús dine raire jaide. Naimiena uaidote:

—Maestro, jai biticue. —Ieconi naimiena llibanote.

50 Jesús dinena raite:

—¿Bue ñiaibitio?

Ie mei Judas micori diga bitinodi Jesúsna gaitadimaci.

51 Iena cianona, Jesús diga itinomona damie ie lloebi llinuanona, Jusiñamui diga nanoca ñairaima ie mullaima jefona jaibonote.

52 Jesús naimiemo llote:

—O furiacania, o jiaí fiodaitio. O lloebi dane eeno. Cue riiduanona, furiñeno.

⁵³ Cuena riidollena, cue Momo cue jicaia, eo ailluena jaienisaí cue dine naimie oretaite;

⁵⁴ iadedí iese cuena riidoia, Jusiñamui facaina lloraini micoriaí cuegafuiaí suiñeite. Cue fiodaille rafuena cuetimaci —llote.

⁵⁵ Ieconí naimie dine bitinomo Jesús llote:

—Omoi butaralluna uitomoi. Omoi lloebi diga jiaí bitomoi. Firiraimadicueta cuena omoi gaitajabilla. Jusiñamui jofomo nagarui llofuecabitícue; iadedí cuena gaitañedomoi.

⁵⁶ Nana bie rafue suide, Jusiñamui facaina lloraini micoriaí cuegafuiaí suillena —llote. Ie facaise nana naimie llofueoicaigano naimiena faionocaillano, aisidimaci.

Jesúdi judíuaí illaicomini dine illa rafue

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesúna gaitadinodí Caifás jofomo Jesúna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micori llogacinona llofueraini ofidimaci. Einamací jiaí ofidimaci.

⁵⁸ Jesús jinafona Pedro aarena jaide. Caifás jofo nairaibirimo jaide. Naie rafue fuiduana naimie uiñollena, nainomo ite jofomo maijiraini diga raide.

⁵⁹ Naimiena meinellena, nana naie illaicomini Jesúmo nicino illana uiñoiacadimaci.

⁶⁰ Iena coniniri siadotimaci; iadedí naimiemo jaca nie isoide marañede rafue illana

uiñoñeðimaci. Diga comini Jesúna ñaitimaci; iadedi taino llotimaci. Ie mei menamie bitiaimaia.

⁶¹ Raitiaimaia:

—Bimie llote: “Jusiñamui jofona judaïredicue. Judaia mei, darui amani illanona, iena dane finoredicue” —lloiaimaia.

⁶² Jusiñamui diga nanoca ñairaima Jesúmo jïcanote:

—¿Ñiese iaimaia uai oitio? ¿Ñie isoide rafue ona llogidotiaimaia?

⁶³ Jesús uai oñede. Naie ñairaima ðinena llote:

—Cai Jusiñamui cajede. Naimie caina uia jira, uanaicinona cai lloñenia, caina duere finoite. Uanaicinona caimo llono. “¿Odi Cristodio?” omo jïcanoticue. “¿Odi Jusiñamui Jitodio?” omo jïcanoticue.

⁶⁴ Jesús ðinena uai ote:

—Jii, naimiedicue. Iena raise llotio. Monamona jiaie cue billamona, imana jaidicue; iadedi ico jiairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiaï cioitimaci.

⁶⁵ Iena cacajanona, naimiemona Jusiñamuina Jesús jeare ñaia jira, naie nanoca ñairaima dama ie ñiroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitañedicaï. Ie ñaïamona dama naimie abina llogidote.

⁶⁶ ¿Ñiese naimiena raitomoi?

Jiaï illaicomini ðinena uai otimaci:

—Naimie fiódaillesa.

⁶⁷ Ie mei naimie uiecona tuallaitimaci. Naimiena ducoðimaci. Jiaï bucoðimaci.

⁶⁸ Raitimaci:

—O Cristodiodena, ¿bu o bucoia? caimo llono.
Jesús uai oñede.

Pedrodi Jesúna janua rafue

(Mr 14.66-72; Lc 22.56-62; Jn 18.15-18, 25-27)

⁶⁹ Naie facaise Pedro naie jofo nairaibirimo ite.
Naie jofo nama mullaño naimie dine billanona
raite:

—Galileamona Jesús bite. Odi ie cominidio.
Naimie diga jaicabidio —raite.

⁷⁰ Nana nainomo itinomo Pedro llote:

—O lluana uiñoñedicue.

⁷¹ Nase fuemo Pedro jaidemo, naimiena jiaie
mullaño cianona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluana Jusiñamuidi uiñote. O
llogamiena uiñoñedicue.

⁷³ Dallu illanona, nainomo itino Pedro dine bil-
lano, naimiemo llotimaci:

—Ua Jesús comini imiedio, o uai bairia jira.
Naimie isoi ñaitio.

⁷⁴ Uai ote:

—Uanai cue lloñenia, Jusiñamui cuena duere
finoite. Uanaicinona cue lluana naimie uiñote.
Ero, Jesúna uiñoñedicue. —Ieconii itava ñaite.

⁷⁵ Iena cacajano, Pedro Jesús lluana uibiñote.
Jaive Jesús Pedromo llote: “Itava nia ñaiñenia,
dacaiño amani cuena janoitio” llote. Iena
uibiñuanona, Pedro jino jaillano, sure eede.

27

Pilato dine Jesús illa rafue

(Mr 15.1; Lc 23.1-2; Jn 18.28-32)

¹ Monaidemo, nana Jusiñamui diga nanoca ñairainidi, nana einamacì diga, Jesúna siadotimaci. Naimiena meinellena siadotimaci.

² Siadua mei, Jesúna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

Judas micori fiodailla rafue

³ Judas micori Jesúna jai gaitatate. Naie illaicomini Jesúna meiniana lluana naimie micoridi uiñuamona, ie comeci iuaina meidote. Illaicominimo ie treinta diga ucubena abido atide.

⁴ Raite:

—Jesús marañede rafuena jaca finoñede. Naimie fiodañeite. Naimiena cue gaitatajama, marañedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

⁵ Ie mei Judas micori Jusiñamui jofojeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio llirinote raona.

⁶⁻⁷ Jusiñamui diga nanoca ñairaini naie ucubena iraiamei, iena siadotimaci. Coniniri raitimaci:

—Naie isoide ucube nainomo joniana Moisés micori jaie rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadicaí. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiodaia, naie eniruemo naimiena raillena, iena ibadimaci.

⁸ Naie ucube muidona damie fiodailla jira, birui naie enirue mamecidi dirue ie enirue.

9 Iemona Jeremías micorí jaie cuega rafue jai suide. Naimie micorídi Jusiñamui facaina lloraima. Naimie micorí cuega: “Cai Israel railla cominimona damierie railla jira, naimiena meinellena, treinta ucubena fecaitimaci.

10 Naie ucube diga jiñora ocabilla enirruena ibaitimaci, cai Nama Jusiñamui llua isoi” cuega.

Pilato dine Jesús illa rafue

(Mr 15.2-5; Lc 23.3-5; Jn 18.33-38)

11 Pilato railla gobernador uicomo Jesúna atia mei, Pilato Jesúmo jicanote:

—¿Judúuai comini illaimadio?

Jesús uai ote:

—Jii. Raise llotio.

12 Ie mei Jusiñamui diga nanoca ñairainídi, einamaci diga, naimiena llogídote; iadedi naimie dinena uai oñede. Ie abina riidoñede.

13 Ie muidona Pilato naimiemo llote:

—Diga rafuena ona llogídotimaci. ¿Niese uai oñedio?

14 Jesús nia uai oñede. Ie jira Pilato uainicaide.

Pilatodi Jesús fiodaillana llua rafue

(Mr 15.6-20; Lc 23.13-25; Jn 18.38-19.16)

15 Naga año pascua railla rafue facaiseconi cárcelmo itinomona Pilatodi comini jicacamiena jamai jino orede.

16 Bie año cárcelmo Barrabás raillamie ite. Naimie mameci eo are soride.

17 Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jítaidomoi? Barrabás raillamie ite. Jesús raillamie jiai ite. Naimiedi Cristona jiai mamecirede.

18 Iese jıcanote; iadedı naimiedi Jusiñamui dıga nanoca ñairaini Jesúri uradoillana uiñote. Naimaci Jesúna meineiacanana jıai uiñote.

19 Ie maijıracomo naimie nia illanona, naie facaise Pilato ai naimie dıne rabe orede. Cuete: “Bimiedi maraiñede rafuena jaca finoñede. Naimiena duere finoñeno. Jaive naio cue nicairillano, naimie muidona cue comeci jarire ite”.

20 Ailluena comini Pilato dıne ofillanona, Jusiñamui dıga nanoca ñairainıdı, einamacı dıga, cominimo llotımacı:

—Pilato caimo jıcanoia, Barrabás jino oretallena jıca. Jesús meinellena jıca —llotımacı.

21 Comini ofilla mei, naimacimo Pilato dane jıcanote:

—¿Nimie cue jino oretajana jıtaidomoi?

Uai otımacı:

—Barrabás.

22 Pilato dınena jıcanote:

—¿Niese Jesúna cue finuana jıtaidomoi? Naimiedi Cristona jıai mamecırede.

Nana uai otımacı:

—Naimiena cruzmo corai.

23 Pilato dane jıcanote:

—¿Nie isoide maraiñede rafuena finode?

Naimaci dınena ado ibi llonoidımacı:

—Naimiena corai.

24 Jesúna jino oretajana jıtaiñedımacı. Iena Pilato uiñuamona, comini jai uri iñenana naimie cıuanona, jınui dıga ie onollina jocuanona raite:

—Bimie fiodaillana cue muidonañede. Bie rafue cuemo jai duiñede. Naimie fiodaite omoi muidona.

25 Uai otımacı:

—Dama iesede. Naimie fiodaite cai muidona. Jiai cai uruia muidona.

²⁶ Ie mei Pilatodi Barrabás naimaci jitailla jira, jino orede; iadedi Jesúna sechedotajanona, naimiena coraillena orede.

²⁷ Dajerie soldaduai Pilato jofomo Jesúna uite. Nana soldaduai nainomo ofidimaci.

²⁸ Naimie iniroi duiñuano, naimiemo jiduirede iniroina jítadimaci.

²⁹ Eecuaimona niga nuiciraina naimie ifogimo jítadimaci. Ie nabeillimo radosina jonete, illaimana naimie illa isoi. Caiñici ifodo raidimaci, illaimana naimie illa isoi. Raitimaci:

—Jadi, judíuai illaíma. —Iese raillanona naimiena jifanododimaci.

³⁰ Naimiena tuallaítimaci. Naimie onollimo ite radosina naimaci llinocaida, naiedo naimie ifogina buta-butadimaci.

³¹ Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jítadimaci. Ie mei naimiena coraillena oni uitimaci.

Jesúna coraía rafue

(Mr 15.21-32; Lc 23.26-43; Jn 19.17-27)

³² Jerusalémona naimaci jaillanona, Cirene railla eniruemona bitimiemo dafafidimaci. Naimie mameci Simón. Naimiena Jesús uiga cruzna rocatatimaci.

³³ Gólgota raillanomo jaidimaci. Ifocoraina eruaila jira, iese mameciredede.

³⁴ Nainomo rillanona, ie abi isirena cacaiñellena, vinomo eriredede rana faianona, naimiemo fecadimaci; iadedi iena naimie facajano, iena jiroñede.

³⁵ Naimie coraia mei, cruzna naidania mei, naie soldadaui naimie iniroi dani coninimo fecasite. Naie iniroi bu uille raillanona uinollena, jifanododimaci.

³⁶ Ie mei ana raidimaci, naimiemo eruaillena.

³⁷ Naimie ifogi afebeimo ie llogiduafulena jonetimaci. Iese cueda: “Bimiedi Jesús. Judiaui comini illaima”.

³⁸ Ie mei mena firiruide iaiaiaia coraidimaci. Damie Jesús nabeimo coraica. Jiaimie Jesús jarifebeimo coraica.

³⁹ Naisodo jamai jaidino Jesuna mameritimaci. Mamerillamona, ifogiaia jaididimaci.

⁴⁰ Raitimaci:

—Navui raisoidio: “Jusiñamui jofona judaiticue. Darui amani illanona, iena dane fnoiticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

⁴¹ Ie facaise Jusiñamui diga nanoca ñairaini naimiena mameritimaci. Moisés micori llogacino llofueraini naimiena jia mameritimaci. Einamaci naimiena jia mameritimaci. Raitimaci:

⁴² —Jiae cominina jillotate; iadedi dama naimie abina jilloitanide. Naimiedi cai judiaui comini illaima raillamedena, cruzmona naimie ana niade billasa. Ie mei naimiena inoiticai.

⁴³ “Jusiñamui Jitodicue” naimie raila jira, naimiedi Jusiñamuina ja inotena, Jusiñamui jitaia, Jusiñamui naimiena jillotaite. —Iese naimiena mameritimaci.

⁴⁴ Naimie diga coraica iaiaiaia daje isoi naimiena mameritiaiaiaia.

Jesús fiodailla rafue

(Mr 15.33-41; Lc 23.44-49; Jn 19.28-30; Heb 9)

45 Jitoma naidai itemona, daje amani horas mona jitibicaide.

46 Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

47 Iena cacajano, nainomo jamai itinomona damierie raitimaci:

—Naimie jaie Jusiñamui facaina lloaima Elíana uaidote —raitimaci.

48 Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade.

49 Ieconí jiaíno raitimaci:

—Ina nai. Dallu seda. Elías naimiena jilloitajabillena sedaiticai.

50 Ieconí Jesús dane ado cuirioita, fiodaite.

51 Naie facaise Jusiñamui jofomo ie fetaca iniroife ana anaba jillacimo motodo menafe cuararide. Ieconí ñuisaño suide. Iemona nofie oni bojode.

52 Diga raiafuai econote. Jesús jillua mei, raiafomona, fiodaillamona, ailluena Jusiñamuina inotinodi jillodimaci.

53 Ie mei Jerusalémo naimaci jaillanona, diga comini naimacina cidimaci.

54 Nainomo ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena cianona, eo jacinaillamona, naimie raite:

—Uanai bimiedi Jusiñamui Jito.

55 Ailluena riñoniai naie rafuena aarena ciōdimaci. Naimiena canollena, Galileamona Jesús diga navui bitimaci.

56 Naimaci motomo María Magdalena ite. Jiaie María jiai ite. Naiñaiñodi Jacobo ei. Naiñaiño jiai José ei. Zebedeo uruia ei jiai ite.

Jesús raiafomo jonia rafue

(Mr 15.42-47; Lc 23.50-56; Jn 19.38-42)

57 Jitoma ana itemo, eo ucuberedimie Pilato dine jaide. Naimiedi Arimatea nairai imie. Naimie mameci José. Jesús dibeimo jaidimie.

58 Jesús abina jicallena, Pilato dine jaide. Pilato “Jee” raillanona, Jesús abina naimie ollena llote.

59 Ie mei Jesús abina cruzmona ana José uanona, jeanide mare userede iniroi diga naimie abina ferinote.

60 Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide.

61 María Magdalena raiafo uico dine jiaie María diga rainadatiiañuui.

Soldaduai Jesús raiafo sedaja rafue

62 Ie areruido, pascua railla rafue illarui, dajerie judíuai illaicomini Pilato dine jaidimaci.

63 Raitimaci:

—Ero, naie abi caitadimie nia fiōdaiñenia, navui llote: “Cue fiōdaillamona, darui amani illanona, jilloiticue”.

64 Ie jira o uai oreta, darui amani raifi naie raiafo raise ibaillena, naimie llofueoicaigano nainomo jaillanona, naimie abi arí oi raillano. Naimie abina

naimaci fñanona lloitimaci: “Naimie jai jillode”. Iese suia, cominina eo jifueitimaci.

⁶⁵ Pilato uai ote:

—Soldaduai omoïdo oreiticue, naie raiafo raise sedallena.

⁶⁶ Ie jira jaidimaci. Raona nitajano, raiafo raise ibaidimaci. Naiena sedallena, soldaduaina nainomo fainonocaidimaci.

28

Jesús fiodaillamona jillua rafue

(Mr 16.1-8; Lc 24.1-12; Jn 20.1-10)

¹ Sábado fuilla mei, monaiacania, María Magdalena, jiaie María diga, raiafona jibuisaidiañuai.

² Ieconí ñuisaño suide. Monamona billanona, Jusiñamui jaienici raiafomo ibaica noficina oni ñuitade. Naie noficimo raide.

³ Eo queniredena eruaide. Naimie iniroi eo userede.

⁴ Nainomo ite soldaduai naimiena eo jacinaillamona, abi docaidimaci. Iemona fiodaitino isoi dallu itimaci.

⁵ Ie facaise naie jaienicidi dinena naie riño iaiañuaimo llote:

—Jaciruiñeno. Coraica Jesúna omuiño jenuana uiñoticue.

⁶ Naimie bene iñede. Naimie llua isoi, fiodaillamona naimie jai jillode. Naimie ifo jeraimo billano mai jibuisaibi.

⁷ Ie mei ie llofueoicaigano dine raire omuiño jai. Fiodaillamona naimie jilluana naimacimo llono. “Galileamo omoï uicomo naimie jaite” llono. Bie rafue omuiño jai lloticue —llote.

⁸ Ie jira raiafomona rajjicaillanona, eo iobilanona, raire jaidiaiañuai. Ie llofueoicaigano dine aisidiaiañuai.

⁹ Ie llofueoicaigano dine iaiañuai nia riñenia, Jesús iaiañuai mo dafaifillano, raite:

—Itomuiño. —Naimie dine iaiañuai rillanona, naimiena sedallena, naimie eillina llinotiaiañuai.

¹⁰ Jesús dinena raite:

—Jaciruiño. Cue llofueoicaiganomo llono: “Galileamo jai. Nainomo omoina cioiticue” llono.

Soldaduai raiafona sedademo suide rafue

¹¹ Jaidiaiañuai mo, nainomo ite soldaduai mona dajerie Jerusalémo jaide, nanoca Jusiñamui diga ñairainimo nana naimacimo suide rafue lllollena.

¹² Iena cacajano, einamací diga iena siadotimaci. Ie mei naie soldaduai mo ucubena fecadimaci.

¹³ Raitimaci:

—Jiaie cominimo llono: “Cai inia mei, ie llofueoicaigano ie abina fiano uitimaci” llono.

¹⁴ Iena cai gobernador fidiia, naimie diga ñaiticai, omoina naimie duere finoñellena — raitimaci.

¹⁵ Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

Jesús ie llofueoicaiganomo iracaiño lloga rafue (Mr 16.14-18; Lc 24.36-49; Jn 20.19-23)

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci.

¹⁷ Naimiena naimaci ciuanona, naimiena sedadimaci; iadedi dajerie Jesús jilluana raise nia ñnoñedimaci.

¹⁸ Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena.

¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza.

²⁰ Nana omoimo cue lloga rafuena naimaci iena inollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.

**Jusiñamui uai: Jusiñamui jito rafue illa
rabenico**

**New Testament in Huitoto, Murui (PE:huu:Huitoto,
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022

145a1f66-dca1-5de3-9c00-4e533605e488